



漫塘文集卷之四

宋籍思改添羞通判建康尉太常寺丞直顯閣主簿高觀漫塘病叟劉學著

七言古風

送王頴叔分教山陽

向來肉食昧遠謀坐談欲復千古雛良平不逐勝  
詭游毛錐竟作書生羞楚山蒼蒼楚水流甲光向  
日金鱗稠酒闌一笑看吳鈞將軍意氣傾九州先  
生身短智則脩百鍊可使繞指柔安邊端藉帷幄  
籌洋宮還獻箴與囚英聲南來動冕旒貂蟬未必



生兜鍪  
再韻謝和章之辱  
老人抱甕真拙謀  
五利多方無一讎  
嗟予老矣盍  
倦游犢鼻豈恤王孫羞  
舍西白鳥湛清流  
舍東古木鳴蟬稠  
晚風徐來月一鈞  
從渠飛鳶墮炎州  
君門有詔道阻脩  
飢來聊復擷芳柔  
諸君行矣攄良籌  
鍾儀不慮南冠囚  
野人何自瞻前旒  
所願邊風脫兜鍪

再用韻呈同席者

由來道同相爲謀  
利交始合終相讎  
灌竇空如父子游  
耳餘莫刷千古羞  
臞張不與俗同流  
常棣相輝華萼稠  
侯生得句魚上鈞  
句法不減韋蘇州  
王子簡古師穆修  
時亦枯枝蔓新柔  
坐談不知改更籌  
絕勝雙鳥各處囚  
可能無策上凝旒  
夕烽猶照萬兜鍪

舟過橫塘有感

平波淺草橫塘路  
曾挽扁舟衝急雨  
朱顏綠鬢氣崔嵬  
欲斥九關揮玉女  
萬古功名付汗青  
九天光



寵生門戶邯鄲一夢兩周星霜壓孤蓬日怙晴風  
樹不停身已老病容衰鬢鬼猶驚東烏西兔自昏  
曉北來南征幾時了海上欲覓安期瓜山間却值  
孫登笑澤畔殷勤訊漁父掉頭不言吾已悟蚤求  
富貴晚長年老少不同君計誤連年旱魃失祈禳  
人肝不厭犬豕腸今年稻肥家有酒萬事且付無  
何有

代賦三十韻呈李果州時遊茅山

退之抗表出潮陽高風萬世爲美談衡行雲氣偶

然爾浪占顯晦吾所慙皇華使者課第一詔歸臺  
省陪朝參獻疏豈止一痛哭引去自言七不堪留  
行隱几臥不應一麾出守天西南利名百念已灰  
冷掃除不盡山水貪行遍金焦到茅阜知有佳處  
須窮探春花秋葉事已過惟有山髮呈鬢髮山神  
頗亦愧岑寂夜奏萬谷笙鍾酣起看瓊樹繞琳宇  
更馳玉馬無停驂子猷好事古無比雪中來往固  
所諳青鞋直上最高頂天風縹緲吹榎楠兩峯相  
對如拱立上公袞冕朝子男羣山歛退就平地滅



沒不見如紀譚巨浸東連大洋海浩蕩直與天涯  
涵却顧淮源赤山下赤山湖舊淮源僅若覆水盈瑩甌父

留不奈景清絕山腰下轉臨深潭客來客去泉自  
湧可能喜笑靜中含嵌崖往往記遺蹟舊雨剝蝕  
苔蘚簦客懷感此重太息學仙便欲老石龕癡狂  
正復自譏笑曠望聊爾依精藍元符舊事不可問  
翠微傑觀猶眈眈有田連阡不輸稅飽食豈計皇  
恩覃渠儂不知游子恨寶鑰屢啓彫龍函留連信  
宿若未厭一笑相屬樂且湛龐眉道士傭中倏成

書自許窺老聃扣門有問不得吐退自包裹如春  
蠶鬣李於書頗涉獵醫卜並試仍多婪提携瓶酒  
味苦短黃獨屢薦山肴甘坐談衮衮不知曉林杪  
忽送鍾聲韻人生離別易感愴况我垂白今氈氈  
明朝日出山下路宿雲散盡開晴嵐君歸千騎圍  
晝錦我留古木繚茅庵期君再整冲天翼老我甘  
作書中蟬

畏雨不出簡張端表昆仲符伯壽諸兄  
我居市北子市南中間萬口喧春蠶子來自南我



自北繚繞東西厭匍匐塊坐不言中有得谷鳥一聲驚晝息翻然却念友多聞獨有君家好弟昆嘯軒團團朝至昏古往今來入討論興來握手眇乾坤一鼓平沙萬馬奔隔牆更喚符夫子青眼相看忘汝爾金丸屢墮銅壺冰欲竟書囊了無底欲辭勇往問荀陳脩竹亭前一欠伸朝來好語聞行人老龍駕雨上天津

速陳李二居士還茅山陳居士不甘世味而

以醫受知於石大夫李居士不受世事而

以基見遇於杜通直通直時就養尉廨乙

亥夏皆來金壇漫塘叟恐孤林壑之望爲

賦此詩以速其行

髯李魁然玉抱璞淡陳蕭散出林鶴華陽洞口笑相逢天風自奏鈞天樂飛雲出岫本無心大隱不必皆山林朱絃自振山水音王喬梅福古猶今君不見洛之南涯溫生北涯石明月灘頭弄澄碧河陽御史一張羅曉猿自掩松關寂久旱得雨方一犁山南種豆猶其時山僮倚擔遲君歸語君雨過



漫唐文集 卷之四  
黃獨肥亦有晚笋穿踈籬急歸燒笋煮黃獨北山  
移文可無續

喜西崗橋成并書邦美東西橋記後

西岡水與洮湖通脩梁自昔橫西東百年興廢人  
不同誰其記者竹庵翁喜君架木續前功朝曦夕  
照明垂虹地脉不斷和氣鍾紆朱曳紫還家風邈  
迨歸來一畝宮幽花野草迷青紅躬耕會有年穀  
豐笑詠五柳卑楊雄可但日高花影重羅帷醉起  
酣笙鍾

和劉聖與顧龍山約客韻

詩筒四出走中涓詩句萬選如青錢曰余借舟期  
七賢共嗅梅花咀芳鮮津頭幾度喚長年晝眠乃  
若經笥邊舉頭急雪風中旋瞪視不見山之巔八  
窓玲瓏繡佛前同來且結西方緣小軒宛若壺中  
天玉琴不斷雨聲傳諾君再宿余敢愆從君索句  
發春妍

寄和趙章泉

章泉先生虎豹章餘子駭逐狐兔藏少陵遊不



衡湘孤吟風月老林塘鴛鴦不送我置傍悵望空  
勞水一方廣文別日天未霜殷勤寄音示無忘新  
詩寫作鴻鴈行憐我病骨猶嵒康續貂聊復寄歸  
航宮墻百雉如金湯登門歲月知何當江湖極目  
煙波滄

寄呈王浩翁府判

天下江山推第一多景名樓信端的君家正占多  
景前第一風光環燕席梁邑歸來縣債了驪駒得  
路乾坤小錦衣聊復效晝游戶庭鬱苒佳氣繞手

栽松菊成三逕更敞軒楹臨綠沼客來寧厭馬  
櫪夜宴不知雞戒曉辟書聞又上公車連帥親題  
仲舉輿只今淮上未安集二虜南望猶睢盱要知  
兩淮須保障保障一徹長江孤邊臣之慮不及此  
但知椎剝供苞苴紅女去機農釋耒荆榛滿野號  
猩鼯君官其間踰十載洞識本末知盈虛願君亟  
分刺史符稍回和氣還邊隅盡收狙詐入赤籍有  
功必賞罪必誅招來耕桑徧隴畝撫摩一意淪肌  
膚人知親上死其長荷戈不憚供前驅闕如當道



臥於菟犬羊遯走寧復餘更歸未用師黃石且待  
玉皇香案側不惟文武見全才要與清朝分淑慝  
靖州風物最五溪畝田歲入人不饑淘沙得金遨  
以嬉瘴煙不逐嶺雲西六花瑞臘春臺熙尤便逐  
客過往稀理亂黜陟了不知夫子豈欲居九夷要  
尊主勢扶時危有言不用時我違畚然不受好爵  
縻向來鄉行誰可晞平生易名慕者誰蘇陳凜凜  
百世師畏塗萬折甘如飴求仁得仁固其宜大明  
當天照隱微直前一疏可忘之江頭後會端有期  
暗香微動寒梅枝臨別不用長嗟咨

送王常博圃歸蜀

東溟之水浩無窮蜀江衮衮來朝宗聖神天子坐  
法宮日月所照梯航通君才當代相如雄雲煙落  
紙聲摩空西來闡教臨辟雍冠帶濟濟如雲從力  
排黨論開至公鳳鳴駭矚朝陽桐太常正俟肅臣  
工歸舟却泝蜀江風蜀天萬里車書同不應一士  
無留中篙師挨柁毋匆匆趣回有詔紫泥封



奉送符伯壽尉太平

一年三伏秋後前大火更借炎官權竹林杖屨北  
窻眠君方陸走水行船君言半世苦迍遭一官遲  
次安且便瓜時驟及非偶然今我不往人爭先交  
承久宦思田園側身東望心悄悄民情厭舊期改  
絃今我不往人煩寃左符再下催行軒欲挽君留  
胡得焉君才明敏性靜專天府四舉賢書連民淳  
不假綵棒懸定知學子來差肩酌君薦藕侑新蓮  
青白不受汗塗遷贈君以筆并吳牋官閒鐵硯勤  
磨研敬亭山下有臞仙耕雲釣雪老林泉癢痾頰  
欲知民編少屈從之古道邊長官報政將朝天集  
英唱第吾同年賸欲因君寄短篇有言不盡中勤  
拳相逢一笑開初筵爲說故人今白顛

題解生山水圖

長江之水西南來江北江南圖畫開君從何處得  
此景錦帆似泛長江回槎牙老樹連荒島兩兩人  
家出林杪鷗飛欲下洲渚寬雲橫不斷關山杳圖  
窮雙嶼金焦峙仙宮縹緲浮寒水拖樓換轉吳波



平閭闔中天日月明  
華陽洞口玉糝羊  
世人傳得神人方  
雪團入口桂椒香  
能令老者壽而康  
瑤池玉佩正丁當  
箬筍聊薦九霞觴  
世言神仙不鮮食  
初平山中果何物  
桃源更有避秦人  
割雞爲黍迎來賓  
白頭

石翁姥

采石江頭風晝息  
掀天雪浪平如席  
浚崖小泊客心寬  
攀蘿曾看望夫石  
天涯望斷人不歸  
露寒猶

想淚霑衣爭似石翁携石姥  
年年對峙夾岡道人  
歸人去我何心雨沐風餐人自老  
比翼鳥連理枝  
年多物化徒爾爲長生殿裏知不知

送趙居父入淮東漕幕

儀真在昔發運司承平舊事猶可稽  
歲漕東南六百萬碩米自淮入汴趨京師  
周原六轡光陸離建臺想像因遺基  
水浮陸走舟車湊轉輸十九資殘寇古今事異吁可悲  
民力已困國不支長才入幕宜深思  
皇華使者須良規



雅去鵲來篇

昨日雅鳴繞庭樹道上行人色驚懼試呼行者問  
如何身爲戶長催殘稅稅自昔稱難理三年尤非  
四年比加之逐保有逃戶每一申明官長怒人逃  
信矣田不逃其奈逃田不知處厥初經界失區畫  
比近立租相什伯大家置產錢欲輕小家鬻產價  
欲增上田只割下田賦賦存田盡因逃去或因土  
瘠遂流移歲久田侵人不知更有鄉胥迫科抑多  
推少割隨胥臆民愚而神難盡欺徃徃增入逃戶

籍以茲逃戶日增多戶長蚩蚩奈若何向來差役  
多輕重戶長之中中產衆比來里正多義役各欲  
供湏有全力搜羅中產無孑遺戶長人人家四壁  
官司禱雨徧明神施行寬政蠲房緡房緡僅可寬  
游手那得實惠霑農民千錢代輸猶可出今日方  
輸又明日父兮母兮叫不聞遺體鞭笞同木石日  
日鴉鳴期會到血洒公庭深不掃遂令着處聽鴉  
鳴鳧飛鳧散心如擣和氣致祥乖致異已甘旱魃  
來爲祟忽驚鴉散鵲交飛高枝報喜仍低枝萬口



懽呼聲動地府今盡放三年稅曳鈴走卒天上來  
立張大榜當衢市黠胥駭愕頓兩足戶長仰天攢  
十指瘡痍未愈失呻吟感激過深仍涕淚又說新  
租亦寬限四年舊欠寧不爾亦知經賦難逭責少  
紓庶可容催索使君從善真如流仁人之言爲慮  
周畫諾一時良易易幾人共拜更生賜人意會同  
天意感急足未回時雨至始知此衍勝祈禳開闔  
陰陽俄頃耳何妨甘澤尚愆期我作此詩禱告之  
象龍可仆蜥蜴縱蛟龍自起霹靂隨謂予不信難

強語請驗吾邦今日雨詩成欲謝更有祈新租輸  
送此其時分科本色歸上戶細民勿使折納遲四  
年逃閣尚充數積弊那能倉卒去且應除豁見真  
的孰恃強梁敢逋負若然民病八九瘳閒暇何妨  
版籍修推排得人弊可見逃租十失五可收更令  
義役廣前制戶長里胥同一體庶幾二役適均平  
不使貧民偏受敝豈惟澍雨快一朝縱有凶年皆  
樂歲報喜不惟乾鵲噪丈人屋上烏亦好

古風雜篇



秋日題儀真寓廨時秩滿俟代

非崖非巔壁立蒼然野花炯炯媚朝日  
樛木繚繞棲寒煙歸乎歸乎幽深此便居乎居乎市聲書喧  
紛去住於吾心定取舍於吾言竹色一軒秋雨後  
荷花十里晚風前錦城不似還家樂獨立津頭欲  
問船

野犬行 嘉定己巳作

野有犬林有鳥犬餓得食聲咿嗚烏驅不去尾畢  
逋田舍無煙人跡踈我欲言之涕淚俱村南村北

衢路隅妻喚不省哭者夫父氣欲絕孤兒扶夜半  
夫死兒亦殂屍橫路隅一縷無烏啄眼犬啣鬚身  
上那有全肌膚叫呼五百煩里閭淺土元不蓋頭  
顛過者且勿嘆聞者且莫吁生必有死數莫踰飢  
凍而死非幸歟君不見荒祠之中荆棘裏鬻割不  
知誰氏子蒼天蒼天叫不聞應羨道旁飢凍死

猛虎行

市有虎毋妄言當關虎士森戈鋌市上一呼人駕  
肩虎雖猛那得前市有虎言非妄君不見左馮諸



邑天下壯斧斤聲斷林壑空猛虎通衢恣來往食  
人肉飲人血沈痛積冤何可說凝香堂上紫煙浮  
風流太守憂民憂一朝下令開信賞籍皮枕骨彌  
山丘虎已滅人患絕夜永猶聞泣幽咽泰山之側  
如可居子後夫前甘死別

病鶴吟上黃尚書

度

并序 伏聞課長淮綏靖

士飛車之績陞西清次對之班爰按彝章當舉自  
夫張良代以某備數切惟此舉前輩所重如韓文  
公之於錢徽歐陽文忠公之於呂公著皆

其名位已高才望素孚故聞者不疑受者  
不愧如某么麼加以不可療之疾分甘屏

處忽冒公舉豈惟駭聽上玷師門抑與漫

浪之迹不相似然昔唐張司業受東平之

辟六杰辟而愧其不就賦節婦吟以謝好事者至

今傳之某才固不敢望司業而受舉不能

報與之畧同用敢擬節婦吟之作賦病鶴

吟寄上

五湖浩蕩平沙暖病鶴摧頽翅翎短萬里空懷宿



昔心忘機已結沙鷗伴華表飛來遼海仙人間嘉  
會恰千年一聲嘹唳九關傳虎豹辟易不敢前盡  
推同類遊鈞天浮丘王喬相後先縹緲遺音墮雲  
際應念沙頭苦焦悴欲令弱羽更軒昂共駕飛廉  
騎六炁瑤池飲芝田戲五湖回首皆塵世菰米熟  
藕花鮮五湖秋色正相便寄聲青鳥謝勤拳摧頽  
病鶴那能然

吳子隆兼隱齋歌

前驅十里旌旗紅後騎蹀躞如游龍綺窻阿閣最

深處歸來燕坐圍香風不如理椽吳夫子岸幘高  
吟酒一鍾嵩少山頭渭水邊耕雲釣月老林泉巢  
由不生沮溺死魚鰕麋鹿俱忘年不如理椽吳夫  
子安閑寄傲庭西偏富貴誠可樂幽棲端足尚牽  
黃復出上蔡門李斯悔殺爲秦相介推有母須求  
祿不應決意歸綿上吳夫子聽我歌當朝劔佩冠  
峩峩趨營未免傷天和古來隱者亦已多潔身亂  
倫如彼何君今非仕亦非隱京塵不染白玉珂青  
衫從事今十載萬事忘懷真實在但令堂上笑平



反豈計庭前羅翠黛是中不減山中樂底用青鞋  
游物外吳夫子吾所敬兼隱名齋足相稱誰其尸  
之勾漏令

傲將軍歌贈周叔子馬帥

君不見細柳將軍專號令壁門不受天子命又不  
見隆中將略天下奇屈致不可就見之丈夫意氣  
類如此達則守官窮守已齋壇未築國士去軍令  
已申美人死王翦定須六十萬李牧必遵前日軌  
掃門求見齊舍人魏勃安庸何足使武皇踞廁對

衛青淮南君臣暗歡喜寥寥古道不復見後來捷  
徑何紛紛炙手儻可熱舐痔未爲勤金珠要結徧  
媒豕鉄鉞倒置由他人傲將軍今無矣杜預苞苴  
通貴近裴度浮沉聊卒歲兩賢屹立尚如斯噲等  
區區焉足計傲將軍今有之我得見之喜可知行  
年六十未爲老三衙致位官非卑毛錐子毋我欺  
妙年手折桂林枝長鎗大劔爾胡爲十載安邊功  
書遍太常旗周宣方歌境土復吉甫已賦明哲詩  
詔書星斗爛駟騎風雷馳平生許國心日莫恐倒



施皂囊九扣闍山立志不移時携一樽酒山水自  
娛嬉傲將軍誰與同子真已去吳門市杜陵不見  
天隨翁賴有侗儻朱杖屨時相從虎丘山頭弄明  
月姑蘇臺上吟清風爲樂良有極大義終無窮謹  
勿扁舟載西子有時獵渭占非熊

代同游者賦宿雲軒呈李果州

君不見流金鑠石氣如焚巫祝並禱天不聞霧霏  
一雨洗乾坤膚寸而合山中雲又不見疾雷破山  
風助勢八表同昏天地閉峯頭一抹斂歸雲赫日  
當空鬼神避祗今歲杪雪霜餘得向巖前自卷舒  
等閑且伴幽人宿明日春回須雨足

送趙玉甫赴穿山鹽場時又有池陽辟命

辟書朝東來海上便擬尋蓬萊坐令斥鹵皆春臺  
辟書暮西至頒春又擬陪千騎江水江花盡和氣  
浮屠將就要合尖滄雷喚起蟄中潛東西惟命夫  
何嫌諸公爭令出門下意豈專爲一日雅君姿秀  
整氣清迢露華凝曉月澄秋曾中武庫森戈矛筆  
下倒寫三峽流甘泉持橐侍凝旒青氈舊物唾手



收番然正應側席求東行西行寧久留祖帳馳華  
軒嗟余守環堵贈言古有證臨分敢無語紛紛曳  
紫腰黃金儼然望之真天人萬世在其後念之徒  
酸辛富貴誠可樂名義吁可畏此意儻無忘鴈來  
頻寄字西至歐春又謝剖于湖山水亦盡時辰

觀瀑布圖

仰觀山模糊俯視山歷歷見卑不見高此恨通今  
昔觀者笑且言畫手非用力安知畫工心獨苦世  
上悠悠幾人識君看白練飛杳不見來跡疑從九  
霄中直下恣噴激六月天無風大暑鑠金石此景  
獨清涼飛雪灑石壁此豈銀河翻餘派墮空碧抑  
豈龍門決洪波注八極昉知畫者心不止存目擊  
山上更有山去天不盈尺丹崖與翠巘群仙所游  
息煙雲不可到日星在几席甘露被草木醴泉出  
巖隙流落人間者萬派祗餘瀝知畫豈予能因畫  
重悽惻聖賢言外意未可紙上得所以說詩者要  
在以意逆安得畫外觀山人共向書中探端的

贈芮醫



乳母夜深紉故衣針墮兒側姥不知兒膚受針口  
啼哭展轉無眠針入肉明日啼聲甚夜來問兒疾  
苦誰能猜拊摩忽到傷針處兒啼欲絕姥方悟醫  
師睨視了無策鄰母驚嗟悉來覩羣兒切聽聞肩  
竦毛髮豎芮生昂然來自言醫此屢探懷出良藥  
布指揣針路斯須穎脫出肌理自如故嗟哉此神  
術小試輒如許我聞在昔陳留市刀鐻工中人避  
世至今山谷後山詩明月夜光光照地又聞宋人  
有藥手不龜世世澣統無羸貲客得其方說吳主

大敗越師因胙土方今北境猶多虞萬金良藥時  
所須汝胡不往此踟躕芮生筦爾笑倖利吾所誚  
喟彼陳留翁異世或同調

天馬歌書劉漕彌正子淮海秋思詩藁後

貳師城空渥洼涸百年徒費秦川權眼明見此玉  
花驄畫工如山筆難貌朔風號朔雪舞交河水冰  
連后土一聲嘶入玉門關掣斷陰雲日當午超八  
駿友六龍天人一咲和鸞雍駑駘百萬那能從

賽龍謠寄陳倅校書模兼呈黃堂



重光協洽之歲夏四月朱方不雨川源竭田家汲  
井灌新秧綆短瓶羸汗流血大守憂民一念深欲  
決銀河起伏陰彌月驅馳徧羣祀雲捲碧霄呈象  
緯聞說南洲有蟄龍百年水旱資神功民言直徹  
九天上絲綸屢下恩光重來往瞻言三百里別乘  
親行古無此潔蠲牢醴薦芬馨願借英靈一瓢水  
瓢水英靈亦何在精誠自與神明會炎官叱馭正  
當空豐隆已駕隨飛蓋歸軒暮扣古城闔霈澤朝  
均千里外秧田得雨變青青麥田流水迷溝塍擊

壤歡呼紛老稚慚愧今年又豐歲典衣沽酒賽神  
龍一飽權輿神所賜神龍貯蠻意已傳似言此賜  
非予專一瓢汲水能回天多謝紫府瀛洲仙瀛洲  
仙人笑揮手龍不言功我何有祇今千騎擁朱輪  
即是商家大旱作霖人

再韻謝和章

萬竈連營橫塞月委輸不繼官倉竭寇攘雖息尚  
游蒐胡虜已衰聞蹠血赭衣開河深復深青青蔓  
草生河陰歲旱民飢神乏祀故老言言徵讖緯使



君事業今夔龍十年準擬調元功銅虎分符又南  
國北來更閱千山重同寮有客居同里憂國同心  
無彼此既知東海之婦可致旱又知疏勒井泉能  
涌水釋囚祗有園扉在蠲租可但寬期會日照齋  
盂食不葷雨濕朝衣車却蓋已罄祈禳徧國中更  
遣緹車來郭外荒祠蟲篆上丹青平原龜兆坼田  
塍拜手殷勤祝田稔活國生民係茲歲再宿爲期  
神效靈三日爲霖民拜賜長淮轉漕速郵傳此賜  
豈獨吾邦專雨餘亟欲披青天那得駕鶴揚州仙

精意回天翻覆手赫赫陽光均九有但得兩君便  
携手齊上紫清扶日輪闔闢陰陽端有道不妨風  
月屬閒人

再用韻

公詩滄海生明月草木光輝涯不竭僕如拙匠運  
斧斤顏汗淋漓指流血心知短綆難汲深拱把之  
木無繁陰風雅墮地幾千祀牢落荒林鳴絡緯眼  
明紙上走虬龍古錦囊中新奏功搜竒徃徃魑魅  
泣窮高不礙天門重鵬飛羊角三萬里筆勢翩翩



有如此渠儂辟易虎負嵎公獨從容禹行水端由  
萬卷胷中在左右尋源無不會詩壇獨上四無人  
烏兔驅車天倚蓋曹劉沈謝不支吾陰何間隔係  
山外池塘不夢春草青愚生已分老四塍縣榻空  
煩禮徐穉一笑相逢俄隔歲不辭入府異龐公祗  
恐言詩非木賜朝來好語日邊傳大惠寧許一州  
專詔書絡繹催朝天紫薇帝庭領列仙釣船已入  
酒聖手清風一枕無何有遮留當道擁車輪尚能  
喚起隨邦人

和陳倅田婦刈麥韻因解嘲

君不見山東健婦把犁耕子美爲賦兵車行我嘗  
一讀三歎息尚想青天聞哭聲又不見峽女生涯  
在兩脚鬢髮飄蕭不堪掠我嘗三復負薪篇亦是  
子美夔州作山東征戰苦未平峽女家貧無斗升  
吾邦之俗異於是賦調不苛閭里寧八月詩人歌  
載績餘暇不如同力穡况復樵枯良易易自昔民  
生在勤力通守於民情最親勞農不憚行侵晨他  
日席前須記取要使深宮識苦辛



運河行

運河岸丁夫荷鍤聲繚亂紅蓮幕府誰獻言運河  
泄水由函管函管掘開須到底運材歸府供薪爨  
庶幾一壞不可復民田雖槁河長滿民田爲私河  
則公獻言幕府寧非忠我聞此言爲民說急趨上  
令毋中輟小民再拜爲我言函管由來幾百年大  
者用錢且十萬小者半此工非堅厥初銖積費民  
力厥後世世期相傳豈但旱時須灌溉亦憂久潦  
水傷田向來久旱河流絕放水練湖憂水洩州家

有令塞函管函管雖存誰復決小須雨澤又流通  
函管猶存不費工只今掘盡誰敢計但恐民田從  
此廢豐年餘水注江湖涓滴不爲農畝利有時驟  
雨浸民田水不通流禾盡死况今農務正紛紜高  
田須灌草須耘盡驅丁壯折函管更運木石歸城  
闔呂城一百二十里不知被擾凡幾人太守仁民  
古無比凝香閣下寧聞此願傳新令到民間函管  
須塞不須毀已填函管無尾閭大舶通行水有餘  
函管不毀民歡娛異時渚瀉無妨渠憶昔採詩周



太史不間小夫并賤隸試哀俚語扣黃堂鈇鉞有  
誅寧敢避

憶昨行寄呈劉法曹

憶昨太守宣城陳人物風流法從臣太息官倉取  
無藝要與邑民圖又計總將一石計其贏三斗八  
升爲定制厥初號令如雷霆奉行誰敢圭撮增愚  
民不解深長慮競喜當時斗斛平新守迎來舊守  
去號令雖嚴誰復顧斛面坡陀斗面高三斗八升  
作常賦後來主簿辛君機太學聲名盛一時挈來

意與上官合委向倉中司出納籌筭親臨絕蔽欺  
戶庭凜凜無喧雜愚民乍喜見明官槩量寧論加  
勺合上供送使有成數羨餘到底歸州府明年按  
籍取之民三斗八升更增五往者不可諫來者圖  
之猶未晚只今太守龔黃比千里癢痾如切已公  
事勤勞絕燕私私錢大半供公使選官受秋輸而  
得法曹賢除弊幾十九積羨踰三千三千寧足州  
家用祇恐從今還作俑明年四斗三升之上更增  
科三十六都之人將奈何



殺虎行謝宜興趙大夫惠虎皮虎腊虎睛

君不見陽羨周將軍射殺南山白額虎千古萬古  
聲流聞又不見宜興趙大夫南山三十有六虎令  
行殺取無復餘一虎昔何少三十六虎今何多虎  
多人不患所患政之苛苛政滅人門猛虎戕人命  
擇禍莫若輕泰山之人論已定大夫性高明下令  
走風雨所知在田里了不見臺府既令民免政之  
虎又與民除虎之苦四境之民歌且舞或云殺虎  
太傷和胡不令渠自渡河我聞此言笑且呵大夫

憂民憂豈必限吾土不然隣國以爲壑信也白圭  
愈於禹古陽羨今宜興大夫邑之主將軍邑之民  
主賓多寡事不同千古萬古同清芬

過司徒墓

司徒墓荒塚纍纍不知數草中翁仲無復存壟上  
牛羊自來去想見當時百萬松佳城在處鬱葱葱  
車馬時來卿相子鍾魚聲出梵王宮年深事遠無  
留蹟只與耕夫資墾闢萬古同成一窖塵官爵高  
卑誰汝識



用前五字韻趣劉聖與建第

君不見茅屋下四壁床敷窄又不見朱門中金碧  
鎖空宅宅成更欲致良材水浮陸走空山澤茅屋  
區區誠已踈朱門汲汲彼何迫勸君勿學伏波老  
自詭裹屍須馬革又勿學金谷人綺窻阿閣綿阡  
陌但令庭宇潔頗與塵囂隔市聲不至亂琴書厨  
煙可免衝咽啞庶幾家人安亦使我心獲吾宗開  
敏姿富有濟時策棟宇著易象義不假探索况聞  
玉堂直視草須元白所期不日成毋使中道畫塵

奉紫芝泥卽刷青雲翮

寄刑臺范黃中

秋氣清秋風高想見刑臺舊居士巾車獨往恣遊  
遨偃仰戴公廬逍遙焦公居想前輩之風流悲末  
俗之崎嶇白眼睨視抵掌嘻吁酌之以漫塘之酒  
侑之以漫塘之藕酒之味醇而不漓藕之性潔而  
不汙以泥干以介眉壽于以明素守對此長歌其  
樂如何相望雖隔於秋水明月幸同於千里

草非跋趙憲汝樵唐率更千字文蹟



草非草真非真柳之骨顏之筋歐張瘦硬可通神  
衆體備兼衆美莫疑與嗣書無首亦無尾當年好  
事人各欲徇所嗜割截同至寶得中固爲喜莫將  
俗眼看墨脫字已漫當年寶匣中十襲幾歲寒祇  
今煙雲披星斗尚闌干麟角鳳觜毋輕棄煎膠續  
弦端有冀君不見四牕寶此不寶他固應落筆驚  
風雨走龍蛇

漫塘文集卷之四

漫塘文集卷之五

宋籍男改添差通判建康府太常寺丞直顯謨閣主管玉局觀漫塘病叟劉某著  
辭免狀

辭免除籍田令第一狀

伏準省劄四月二十三日三省同奉聖旨劉某除  
籍田令其螻蟻微生忽叨恩命戰悸不知所云抑  
區區情素有不吝不吐露者某蚤由科舉僥冒出  
官爲尉爲掾爲令汲汲寸進初非忘情宦達一自  
辟屬倉臺偶得風疾浸淫滿面乃丐嶽祠以歸曾



未兩月復拜堂審之命某是時猶意此疾可療欲俟小愈奔走赴闕不謂所感日深百藥不效以迄於今形容變改語音僅存竊自循省豈堪綴班行之末重念某幼時家匱不免饑寒病廢以來一意耕桑服勞過甚年甫六十手戰而難於執筆髮脫而不可勝冠晝以目昏廢書夜以心忡忘寢雖欲少效尺寸以自見於明時有不可得瞻望闕廷但深悃結所有省劄不敢僭效達官寄畱州縣謹端拜襲藏傳之將來爲子孫榮伏惟鈞慈特賜敷奏

改命時髦以光初政容令孱瑣自放漁樵須至申聞者

### 第二狀

某伏準省劄以其辭免新除籍田令奉聖旨不允疾速起發前來供職某洊膺寵命俯極戰兢伏念某蚤歲效官位不過椽幕中年屏居身不入朝市容臺列屬中旨趣行皆耳目之所不接夢想之所不到况聖上天德出寧之初正萬化維新之日而公朝進擢猥及么微在某可謂非常之遇雖無知



如草木亦覺欣榮雖無情如鳶魚亦當飛躍其其  
敢固執其愚仰孤鴻造實以衰疾之軀不但形容  
如鬼疎率之性時或語言如狂且久安漁樵遂廢  
筆硯猶之猿鳥必不可與麟鳳同瑞聖時猶之瓦  
礫必不可與珠玉竝登王府惟當退伏田里含哺  
鼓腹詠歌太平所有籍田令職事或聖君賢相必  
欲矯俗之敝擇不求者與之則世之志不苟求而  
學行才美百倍於某者何可勝計姑以所知言之  
前鉛山縣丞羅愚鹽官縣丞周師成新湖州錄事

參軍杜範新真州教授潘彙征愚乃故樞密點之  
季子餘皆進士第是四人者稟性不同至事親以  
孝律已以廉蒞官以勤臨民以恕行之以公不顧  
望以避怨得之有道不僥倖以干進則四人者同  
歸一揆又前真州支鹽倉洪秉哲初擢第主歸安  
簿甫數月母病馳歸因留不去母病有間勉之仕  
不得已授真州鹽倉郡守豐有俊檄入幕賴其助  
有俊爲本路提舉復攜以行及爲淮西帥以隔路  
不可檄致乃轉以屬江淮制置李珣珣屢檄其出



而本路新提舉汪綱又欲其留秉哲難於從違遂  
兩不就因以避事爲珏所劾至今未得差遣其兄  
亦四請鄉舉免舉不到省遇赦不該恩兄弟怡怡  
不知老之將至前修職郎戴埜爲麗水尉寄居有  
挾勢奪村民之舟者埜執不與守怒撻吏奪舟與  
之埜卽拂袖去初埜弱冠其父爲求同姓牒因發  
國子解登第埜以家狀中微有遷就言之輒愧汗  
其後父喪服闋遂自陳棄官今已十餘年家居深  
山惟讀未見之書爲有用之學閣學楊簡知溫州

日已嘗論薦乞命以官是二人者其特立獨行無  
求於人尤爲人所難或公朝不以某爲狂僭於六  
人之中特拔其一而改畀之皆足以使頑夫廉懦  
夫有立惟是某自爲已計旣重於方命之誅妄爲  
人言更合貽犯分之罪尚祈寬大之朝曲賜矜貸  
某不勝俯伏戰悸之至須至申聞者

### 第三狀

某伏準七月二十七日省劄以某再具申乞寢免  
新除籍田令職事三省同奉聖旨依已降旨揮不



允疾速前來供職某瑣瑣一介仰勤君命至再至  
三臆禿寬驚罔知所措其敢固執愚陋數犯天威  
實以某賦分素薄得疾多端最是風毒上攻形容  
變改已嘗具申不復喋喋兼某少不涉學懶與性  
成長不通方動與物忤故偷安窮巷以苟餘生蓋  
欲仕不能非能仕不欲與老成前輩德尊行高養  
素丘園者不類若貪冒寵榮強顏就列則是積年  
抱疾乃爲今日進身之階必速煩言上累初政某  
雖萬死不足塞責伏望察其由衷曲賜敷奏檢會

某已申事理施行伏候指揮

辭免特改奉議郎添差建康倅第一狀

某伏準鎮江府遞到八月十四日省劄以某三具  
辭免新除籍田令三省同奉聖旨特改奉議郎特  
添差通判建康府仍釐務填闕某么微之踪方命  
至三三正爾戰懼莫知所容而異數沓來驚寬益以  
四逸竊惟改秩之必用舉主丞郡之必更作縣此  
祖宗成法所以垂萬世之規否則必嘗登對而知  
其能擢用而試之事某近者雖荷甄收俾綴奉常



末屬卽具辭免初非已經登對及曾受任使之人  
況籍田有令雖官王朝在昔列於九品於今通差  
選人某昨被恩除已以疾控辭乃今躡陞朝籍遂  
佐留都則受之是前日之辭爲飾詐今日之受爲  
擇利有一於此罪在不赦某則安敢又某昔在先  
朝年方強仕嘗被旨赴都堂審察亦以疾辭迄于  
今十有八年以年則昔壯而今老以病則昔淺而  
今深辭受一殊萬死莫贖伏望不棄小物曲諒愚  
忱仍賜敷奏一併收回誤恩毋使蟣蝨微臣稽違

君命以速明刑不勝席藁俟命之至所有省劄某  
不敢祇受除已寄收金壇縣庫聽候指揮須至申  
聞者

第二狀

某準鎮江府發到九月十六日省劄以某辭免特  
改奉議郎添差通判建康府恩命三省同奉聖旨  
不允某疾病餘生荐叨誤恩半年之間四上控辭  
之牘自知狂僭罪在不赦今又拜不允之命仰體  
天涵地育之仁感深泣下但某爲風毒所侵漸類



惡疾委不可仕若牢辭不已不惟上紊清朝亦恐得罪公議謹當尋訪良醫多方治療儻數月之後稍覺痊可卽祇拜恩命以效奔走或疾證已深藥力不及亦當續具情實申取指揮庶進不孤造化曲成之恩退亦不失臣子拳拳奉上之義須至申聞者

第三狀

準十月十三日省劄以某申乞居家尋訪醫藥奉聖旨依已降指揮不允給假兩月將理候假滿日

起發之任某卽已遵稟外今假限已滿所合具  
某聞事君當致其身尤當用其情故公爾忘私國爾忘家者士大夫致身之義病則免老則致其事不強其所不能不戀慕其所不當得者士大夫所以用其情國家所以原其情也某愚不肖蚤歲塵忝科第服勤州縣凡十有七年見義必爲當仁不避惟恐一日之失其職雖位之卑名之微其於致身之義略亦無愧不幸有疾屏跡田里垂二十年聖明御極振起滯淹某偶以踪跡近似首預招延



之數嘗以情實申控復拜改秩丞郡之命凡海內  
陸沈七選之人誰不欣艷以爲非常之遇某或牢  
辭不已人必以爲沽激故某一再控辭之後不敢  
喋喋只乞居家博訪醫藥候痊可日拜命尋準前  
件省劄某仰體造化曲成之意多方從事醫藥緣  
所感風證歷年已深百藥不效藉有良方非年歲  
間可以責效竊恐稽留成命罪在不測謹再具情  
實干紊伏望哀矜特賜敷奏容令某守本官致仕  
或以其年尚未及不忍棄捐卽乞陶鑄嶽祠差遣

一次異時或有痊可之日誓當縻捐以圖報效須  
至申聞者

辭免除直秘閣宮觀第一狀

某伏準省劄以某陳乞守本官致仕或祠廟差遣  
正月二十三日三省同奉聖旨不允依舊奉議郎  
除直秘閣主管建昌軍仙都觀任便居住者累月  
籲哀實迫於疾一朝從欲俾便厥居聞命震驚拊  
躬感泣仰恃乾坤之大載陳螻蟻之私夫老於選  
調而有脫選之榮久矣逸居而冒均逸之寵皆爲



異數所合牢辭顧惟中廐之病駒許仍伏櫪更類  
深林之倦翼得且安巢其敢不已於言以瀆蓋高  
之聽惟臣子之直中秘乃國家以表外庸要須治  
郡而著循良之稱按部而有澄清之效倘不由此  
弗輕畀之深惟洪造之曲成蓋援同升之近比其  
實才品有異又且輩行不同彼真養素於丘園此  
特卧疴於田里至學問源流於諸老詞章模楷於  
後來皆其所優非某能及倘恩榮略等將負乘致  
譏伏望朝廷特賜敷奏收回直秘閣恩命姑令某  
之賜須至申聞者

第二狀

某伏準省劄三月二十三日以某辭免特授直秘  
閣奉聖旨不允伏念某蕞爾小臣懃辭恩命展轉  
經年若必待控辭貼職得請而後拜命實恐稽緩  
以干慢令之誅謹已望闕遙謝祗受奉議郎主管  
建昌軍仙都觀恩命訖外有中秘之職實非乍脫



選階素無朝績之人所敢冒居謹昧死固辭期必  
得請伏望公朝檢會某前申事理特賜敷奏施行  
伏候指揮

第三狀

代作不錄

辭免除直寶謨閣官觀仍令吏部理未陳乞  
磨勘年月日與依條轉官給告第一狀

某伏準省劄三月十七日三省同奉聖旨劉某除  
直寶謨閣依舊官觀令吏部理未陳乞磨勘年月  
日與依條轉官給告者某恭觀省劄不勝戰懼某

竊惟名以勸功官以序功祿以食功乃聖世馭臣  
子之成法故一命以上苟效職公家位分雖殊皆  
可得祿而官則不然非有考任不遷臣子苟有考  
任則本品雖殊皆可遷官而職名則不然有無不  
可以例言遷轉不可以日計蓋國家設此以鼓舞  
士大夫趨事赴功之心故聖世重之如某者蚤得  
惡疾形容變改不可以蒞官臨民故三十年來屏  
伏田里未嘗尸一日奔走之勞向叨祠命已愧罔  
功竝不敢支請俸給今又畀之則非所以食功久



侶漁樵姓名不入考功之籍而令計在家年月進  
秩則非所以序功而況職名向也無功而得今也  
無功而遷其於勸功也何有某自揣微賤不敢犯  
分控辭以速罪戾惟是光廟謨訓內閣寶藏寓直  
其間至爲遴選固有累任監司郡守而未得者某  
實何人其敢冒受伏望公朝察其愧懼之真情非  
有一毫欺僞特與敷奏賜之寢免實受隆天厚德  
保全晚節之恩某無任祈叩之至

第二狀

某伏覩鎮江府遞到省劄以某辭免新除直寶謨  
閣等恩命四月二十一日三省同奉聖旨不允某  
以螻蟻之微辱乾坤之造控辭不獲其敢荐有申  
陳自速罪戾而某區區愚心有不容自默者竊惟  
先朝以來臣子有不由實歷而躡陞秩序者非其  
學問過人必其節行超俗某蚤歲涉獵時文竊取  
科第一行作吏卽又棄置汨沒吏塵初無學問可  
言中年得疾醫藥不效從所屬保明去官疾勢綿  
延以迄于今蓋欲仕不能非能仕不欲初無節行



可述向沐誤恩改官昇職辭不獲命黽勉祗拜已  
深愧懼今安敢復冒殊私伏望憐其賦予之薄察  
其祈叩之誠特與敷奏收還直寶謨閣等恩命使  
某且得偷生閭里與田夫漁父詠歌太平實受隆  
天厚地之恩伏乞照會申聞事理伏候旨揮

辭免除太常丞第一狀

先準三月十七日省劄以其再具辭免除直寶謨  
閣仍舊宮觀令吏部理磨勘轉官恩命奉聖旨不  
允尋準吏部給到朝奉郎直寶謨閣主管建昌軍

仙都觀告一道未被受間太常寺轉人送到六月  
二十四日省劄劉某除太常丞某竊惟事君臣子  
之大義欺君臣子之大罪某幼知讀書卽識此理  
不幸當強仕之年得癡風之疾形容醜惡不可出  
仕不得已從所屬保明申乞祠祿後荷朝廷矜憐  
特與改秩仍昇職名在某已爲非常之遇今春復  
荷誤恩遷官進秩其實何人有此僥倖故縷縷控  
辭不敢祗拜今茲復冒恩除載念延閣美名容臺  
清選雖皆非某所可當然亦必非某祈叩所能竝



免持衡二者之間則延閣之名猶可冒受以養疴  
容臺之屬必不可偷安而家食矧其自入夏以來  
不惟舊疾有加老疾併作腹臙滑泄齒牙動搖日  
食惟糜粥數匙以上氣血益衰目昏耳聵視聽不  
爽手足戰掉舉動失常若使情不自量勉趨朝列  
必致顛踣爲明時羞除已望闕遙謝祇受朝奉郎  
直寶謨閣主管建昌軍仙都觀告劄外所有新除  
太常丞省劄見寄畱金壇縣省庫擬望鈞慈察其  
情之真而不敢爲欺哀其命之窮而不可大受特  
賜敷奏收還恩命庶或可少延殘生實受造化終  
始生全之賜須至申者

第二狀

七月十三日伏準省劄以某辭免新除太常丞恩  
命奉聖旨不允某蟻蝨微生叨塵清選實千齡之  
幸會其敢喋喋洊瀆鈞嚴自速罪戾而區區之心  
有不容不盡吐露者某幼讀論語至伯牛有疾子  
問之自牖執其手竊疑冉耕聖門高弟蓋嘗步亦  
步趨亦趨情不爲不親而其疾也夫子獨嫌於一



顧乃自牖執其手何哉豈非疾證之彰容貌之改  
雖聖人亦有所不欲近耶某不幸蚤迫親養奔走  
田間皮膚爲風毒所乘得疾白駁雖無瘡痂亦無  
痛楚而風毒浸淫自頭面達於四體強半變白形  
容之惡見者駭異而臣子入朝盍修陛見之恭某  
疾證若此其敢叩玉階方寸之地望威顏咫尺之  
間又某頃以疾由熱致服涼劑過多歲晚脾泄十  
日而九手戰脚弱目昏耳聩實不堪奔走伏望公  
朝哀矜孱瑣曲賜奏陳收還誤恩仍畀一祠廟差

遣庶幾未填溝壑尚苟餘生某不勝祈哀請命之  
至

第三狀

代作不錄

第四狀

昨準省劄以某第二次辭免太常丞除命又準鎮  
江府備坐省劄津發催促起發某前來供職某雖  
抱病日久迫於朝命不敢寧居已於九月初二日  
望闕遙謝祇受太常丞恩命擇十月二十三日起  
發赴行在供職回申尚書省至日起發所居金壇



縣於二十八日至平江府緣知平江府張殿撰乃  
某同年進士提舉浙西常平事曹秘丞亦某年家  
皆有疇昔契分相率迎迓而某識以病昏神與形  
離相見之初爲贊者所誤遽以曹爲張旣而兩司  
合席郊勞卽席題名某復誤以曹爲薛蓋其精神  
恍惚如醉如夢故瞶亂如此乃兩司隨行吏兵所  
共見非敢飾辭若使某不自揣量力疾前邁必顛  
踣道塗或幸善達亦恐仍前恍惚瞶亂有紊朝儀  
不但負明時之選且將爲頌臺之羞其實不敢除

已於次日回舟金壇尋訪醫藥外伏望公朝察其  
情之真憐其辭之哀特賜敷奏赦其罪戾容其退  
歸庶幾保全莫景以苟殘生伏候旨揮

### 第五狀

伏準省劄催趣某疾速前來供職仍具已起發日  
分申尚書省某蟻蝨小官累勤朝命震懼不能自  
寧伏念某區區之蹟一自去冬奔走赴闕得疾中  
道卽具申聞乞賜敷奏容令退歸尋準省劄奉聖  
旨不允給假將理某時雖自揣疾證已深非可朝



夕責效而感激洪造貪慕明時猶覬殘生未泯勿藥有期或可扶僊支羸一造闕庭故不敢荐有申控不謂某命分之窮痊平無日腑臟泄滑晝夜不止已及半年肢體骨立精神耗散視聽俱衰又犬馬之齒實已七十筋力亦有不可強者擬望公朝哀其疾病之深死亡在近特賜敷奏許令守本官致仕庶免顛踣道路詒笑方來某不勝忍死祈哀俯伏俟命之至伏候指揮

回王殿院遂宣諭 玉音劄子

敬承臺劄宣示玉音知不肖姓名誤塵於簡記意過情聲聞或契於傳聞致勤天陛丁寧霜臺開曉某退自修省不任戰兢伏念某少也獨居無師友之益長而爲養惟農圃之依自忝微官卽因多病閒居三十載恍不知歲月之更嘉會一千年徒緬想風雲之盛頃游叨於拔擢其敢昧於稟承而疾弗可爲久而益甚自去歲還歸於中道迄於今偃臥於一牀神識昏迷事轉頭而輒忘關鬲否塞言入耳而不聞重以風虛養成痰厥顛沛而險易弗



顧委頓而饑渴罔知將何以趨殿陛之間對冕旒之下敢祈敷奏曲赦殘生父教之忠雖自幼不忘於猷畝天奪之鬼竟此身莫望於軒墀

辭免除將作少監第一狀

準省劄六月十一日三省同奉聖旨劉某除將作少監者伏念某衰孱朽鈍狎被龍光猶有人心寧忘結草銜環之報顧病在肺腑景迫崦嵫勉造闕廷必將中道顛踣爲明時羞昨者殿中侍御史王某宣示玉音某已具病證托奏知訖不謂猶未徹

聞致洊叨恩除進貳匠監皇懼戰慄不知所云謹再瀝血誠歸投大造伏望朝廷哀矜特賜檢照某累申事理施行所有省劄寄留金壇縣庫某不敢祇受須至申者

第二狀

伏準省劄以某申乞辭免新除將作少監恩命三省同奉聖旨不允某竊伏自念一官漫浪了無寸長猥以姓名徹於造化粵自嘉定改元叨堂審之命寶慶御極冒籍令之除繼官之陞朝使外贊治



於留都祿之真祠使內通班於延閣以及端平更  
化又復累被恩除至略其未嘗身歷朝行遽使之  
名參匠監譬之犬馬但未顛仆猶當激昂而某三  
十年間懇懇控辭有同一日儻非病形於外容顏  
不類於故常病成於內狂易或見之言動則是飾  
其一時罔上之詞以成其三十年慢上之罪國有  
明命某其敢逃伏望公朝察其一語不欺念其餘  
生無幾特賜敷奏檢會某自去冬以來累申事理  
容令某守本官致仕實受隆天厚地終始生全之  
賜須至申聞者

第三狀

伏準省劄以某疊具辭免新除將作少監恩命閏  
七月初六日三省同奉聖旨不允疾速前來供職  
者伏念某蚤歲應舉覓官逐祿州縣非敢矯亢爲  
高實緣肺受風邪形容如鬼不可出仕黽勉退藏  
聖上登極之初端平更化之日荐叨恩命擢寘周  
行深原朝廷之意似以其廉退而獎之而其實非  
其人辭不獲命積負凌兢更沐殊私俾進貳繕監



苟可尚延視息其敢不卽欽承有孤洪造而某自舊歲以來風邪內攻不但形容變改更苦氣血衰微時一顛仆如小兒驚癇狀今夏至秋此疾已三作每作非經日不能省事非半月不能起行步履日艱證狀日惡倘不及尚有知識控露愚忱祈得請於主前則一旦昏迷填委溝壑必且懷慚於身後是用不懼么微忍死喋喋干冒鈞嚴伏望哀矜卽賜敷奏特與檢會某累申事理容令守本官致仕須至申聞者

第四狀

伏準省劄以某三具狀申省乞賜敷奏收回將作少監恩命容令某守本官致仕奉聖旨依累降指揮不允者某位下官微不應屢控辭免引年致仕亦合從所居府縣保明具奏不應數以自聞寬大之朝悉加原貸怙終方命國有常刑竊念某昨所陳賤軀風眩之疾感受已五六年今歲自四月至七月亦一再發甚者閏七月初十日因縱步所居敷化里田野間俄爾顛仆比鄰驚異亟褻子姪掖



致卧榻之上昏憤竟夕生意復延今若迫於君命  
趨造周行萬一旅進朝參斯疾驟至隕越於軒陛  
之下朝廷始信某言不妄亦已後時謹再具情實  
控告公朝伏乞俯憐危惘仰瀆聖聰早賜檢會某  
累狀所申施行庶免如前所述上遺天朝之羞而  
某視蔭幾何亦遂首丘之願天地大德某之永畢  
無所報酬倘或未鑒愚誠卽乞行下鎮江府金壇  
縣廉訪某今歲閏七月內疾作事狀一言不實其  
伏罔上之誅伏候指揮

第五狀

辭免除直敷文閣知寧國府第一狀

第二狀

辭免除直顯謨閣主管成都府玉局觀

第二狀

辭免令赴行在奏事一狀

並代作不錄



翰與今法行其奏事一米

第二米

漫塘文集卷之六

宋籍畧際差通判建康府太常寺丞直顯謨書管玉局觀漫塘病叟劉聖著

書問

通田輅院

某得令名於士友間舊矣亾師友周南仲無急時  
書來道執事有意見訪汎掃敬聽旋聞卽途榮上  
不果此來賦未見君子之詩十年猶一日也維時  
春和伏惟接武清華台候神相萬福某蚤得惡疾  
形容如鬼自棄明時今老矣頭童目昏頷髭無黑



者豈復敢自通於當世有位之士惟聞賢者有進  
用之階世道有清夷之望以是自喜敢問學省之  
除在幾時大科異等不過爲入朝計耳似不必屑  
意朋儕中同志者以道卷舒而不視時俯仰竊計  
自處已定詩曰靖共爾位正直是與神之聽之式  
穀與女敬誦此伸愛助姪子某再請鄉舉今就省  
闈欲一識先達因其行敬以一紙寫繾綣且以與  
姪子爲左右之容居山林久不開書尺筆縱字大  
伏惟亮之

通趙章泉

某家金壇去丹陽驛七十里非得得在道者不到  
故欲寄音無從中間凡再得詩三復可復自成疎  
之句鄉風長懷幾不能遣莫冬得三詩欲屬范南  
卿附便念南卿猶未除喪寧能作置書郵又爾中  
輟今聞友人王去非將專人過番易道玉山謹以  
奉寄宣筆百枝匹劄併往人生七十者稀過此皆  
是贏得吟風嘯月其樂如何世徒以陶靖節解印  
綬賦歸去來爲高不知其榮木等篇所期甚遠所



任甚重所樂甚真洙泗以還無此氣象先生其斯  
人比歟某欽仰

回李秘書心傳

某自聞召命之頒日傾耳以聽回船東下且以日  
計曰可矣忽奉手教乃知當此春晏猶艤舟江岍  
爲泝峽計易退難進固足以崇高節抗浮雲獨不  
念當饋之思久席之久耶就審德盛仁熟罄無不  
宜隨軒眷集動與吉會良慰緬仰聖上克勤克儉  
有夏禹之德務學不愧商高宗周成王而左右未

有傳說周公之輔秘書辭歸之章再上而報可未  
聞深惟聖意豈但欲以史事相付而已願戒舟師  
亟揆施乘流以慰中外之望某年迫七十視聽俱  
衰大非疇昔侍見時比更化之初羣賢彙進頓聞  
有相援引者今讀秘書奏疏又知嘗置賤名其間  
某少也不才況今已老求之在昔固未有四十辭  
官七十復出者所幸與王去非爲婣家備知此心  
嘗爲精言於當路已見諒矣盛意如許不敢忘頒  
貺宣毫洪扇使內得以寫素抱外得以揚仁風感



喜可知一故舊有錫渾天儀幸求得之謹以爲觀  
天之助有懷拍塞探伺舟過丹陽因得吐露春寒  
猶力道間厚愛是祝

回柴安撫叔達

伏自丙寅開邊虜運浸微我之邊備亦小弛然而  
遺醜未殄狼心故存乃丁丑夏乘我撤戍長驅絕  
淮邊遽上聞中外震駭惟執事隱然孤忠貫徹穹  
壤才足以酬酢萬變智足以奔走羣雄以浮光孤  
城二千羸卒摧其堅鋒剿其萬衆爲長淮千里保

障當是時天下士無問識不識皆想見風采恨不  
得備顏行奉要約某雖不肖然必也亦嘗有志斯  
世寧能泊然自棄私謂執事之道且行乎朝廷矣  
而浩然有歸興殊不可挽豈味黃石戒又先子房  
一著甚善甚善甚盛甚盛靖節窮士得從檀公游  
具有故實況某與執事寓里相望不遠百里命中  
車棹孤舟亦非難事自惟疾疚日侵形容如鬼不  
可以入城市惟有懷仰天與幸會令嗣判院搏扶  
搖而上實始吾邑執事復不鄙夷因而賜之書盥



手發函長跪疾讀蓋溫乎如惠風和氣之襲人炳  
乎如隋珠和璧之在目洋洋乎如韶濩正音之入  
耳其爲榮荷可勝言哉自冬徂春以鄉邑民饑癘  
憂蠅營無補分毫有稽奏記恐速罪戾尚惟高明  
以度外處之未賜斥絕使猶得從綠野之遊於他  
日某伏紙拳拳寵頒某物尤切銘佩吳箋三百得  
之親舊間頗勝常用者輒以供翰墨之需某物併  
以薦北海坐中一酌辱命之留幸甚時事孔艱正  
恐元戎未應終棄人間事詩曰無金玉爾音而有

退心勉之

回周馬帥虎

經年不上記自識將軍禮數寬必不加罪但某平  
生願屬馮異而台座亦逢人說項斯人事好垂老  
未相遇謂此情何春夏之交峭寒猶在恭惟味黃  
石戒從赤松遊岱嶽爭高璇穹錫美台候動止萬  
福某病骨衰頽鬢髮蚤白猶幸鑷去可誑人以未  
老年來乃一向白盡今白者又轉而黃古詩云久  
知老會至不謂便見侵念之憮然太尉德成於身



功成於國名成於天下後世來者更言體益強健  
神光炯炯窮林園之勝過綠野堂中人集壽福之  
全愈耆英會中客盛矣哉古未有也敢問比日有  
何賦詠願併錄示使得成編布金寺曩求書額村  
僧無從往謝謹爲納摹本去近懇常平使者得錢  
創社倉於里中欲求社倉二大字告不吝唐裔李  
秀才自言將踐約修敬因得拜此且以無灰酒十  
罇修歲貢拈秃羊毛筆不能成字伏惟照察不宣

二

頃因李君便附書其回也辱報字甚慰連月淫雨  
陰雲不開屏居水潦四壁太似坎中蛙氣悶悶不  
能吐來教之頒正爾故緘而雲翳劃開日光穿漏  
殆非偶然就審北辰回旋舊栖詠歌千古百靈呵  
護萬福來同意氣開懌不可言也向來五噫公論  
頗亦聞之竊謂世上是非初無定在人生禍福要  
有定分以其無定在則今日之是安知不爲他日  
之非今日之非安知不爲他日之是要不必深辨  
要有定分則聽之而已雖辨何益眼前一輩說是



說非說禍說福之人藉方得志只是乞食播間者  
稍饑則又前矣願太尉一切達之社倉二大字筆  
力不啻千鈞重而更端莊停勻披玩不能釋手某  
物并貺暑月水飯有相其敬不德寒鄉寡人無一  
物可薦誠去歲一士友見教造松醪飲之可治風  
濕脚氣造成香味頗勝姑納上四尊儻謂可飲當  
續致鄉間醋底向聞庖下頗有知音納三十小尊  
輕瀆愧甚當暑壽重是祝

回何撫幹處恬

別不計年悠悠我思無日不在震澤潯溪之上也  
春杪幼子自梁料院處歸忽領手筆乃知圖南之  
鵬曾未忘控地之鳩鷄感外重慰入夏多故尋以  
雨水相仍具謝不敏明星有爛有目具瞻况嘗乘  
槎誤至天漢者耶朝來爽吹迎秋恭惟幕府高閑  
台候神相動止萬福仕於今難矣而大府爲尤難  
其位高而責不及情親而言可入者獨上幕耳而  
執事再居敢不重賀雖然盛名之下難居執事疇  
昔以太學諸生上書論天下事慷慨激烈士無問



識不識讀其書味其意往往壯其氣高其節繼聞  
彈冠出仕又孰不遡風而想企踵而望曰是嘗有  
言於未仕之前其肯媵阿於既仕之後而側聽累  
年未有聞焉執事豈與庸庸者比患不改秩患不  
立朝矜一語之合希一盼之溫以自爲重哉傳曰  
三年不鳴一鳴驚人三年不飛一飛冲天勉之而  
已須先正顯學勤王錄序謾寫去殆不可用唱和  
集序續納頒貺多品甚感吳箋閩板友書真是未  
能免俗書至此亦以自笑秋後登高望遠必有佳

趣傷今吊古必有奇作毋惜寄示金陵同官爲最  
多其能以世道自任不唯阿隨俗者爲誰皆所願  
聞

回宜興趙百里與慙

戊午己未年間某爲儀真掾識門下士天台徐不  
愚時執事年尚幼方侍先少師官金陵不愚爲某  
言執事高明之姿凝遠之度渾然天成非學力可  
及某時起敬欲介不愚援外舅梁吏侍州里之舊  
拜先少師下風因叩東閣快鳳星之覩而局於官



守厥路無由某旣去儀真而先少師寢上榮塗以  
至開大藩登禁從某復限以位分欲進不敢然頗  
聞先少師逢人說項斯所與外舅書必賜垂問知  
過庭之助爲多感流水之知懷高山之仰今三十  
年矣去歲治所人來誦今大夫之賢不容口大要  
以爲不吐剛不如柔君子有所恃而不恐小人有  
所畏而不爲問姓名爲誰則執事也乃知先少師  
家法有傳徐不愚疇昔之言爲不謬某三十年起  
敬爲不虛喜欲起舞林下殘生不敢直以姓名自

通略因友人王頴叔附致拳拳豈意撝謙不間疎  
賤得得遣介賜之手書辭旨溫然若施之所敬某  
何敢當重以冊府之珍文房之寶上尊名茗粲然  
前陳使得仰高哲之風流滌世俗之塵埃澆胸中  
之磊塊而濡毫引紙又足以發揮之真人生大快  
意事而遲暮廢學重不敢當也惟有感愧世變益  
下人物隨之州縣間殆不復見廉平之吏執事其  
庶矣乎語曰爲山九仞功虧一簣惟勿恃其已成  
而益求其所未至士之狂者多忤人勿怒其狂而



海城文集卷之六  
九  
虧待士之誠民之頑者多撓政勿疾其頑而虧拊  
民之仁位之在上者多喜人同已勿狃於同而虧  
行已之信則善矣美矣不可以有加矣執事其圖  
之屏居無可薦誠朱侍講語錄一部納上絃歌之  
暇時一寓目或有補萬分其他寒燠之間頌禱之  
辭某以爲無益於愛助敢略幸察

二

一春煙霾障日風雨不時糴貴民貧歎恨滿耳鳥  
啼花發皆在愁中傳聞某官周行原墊咨訪閭閻  
逋租法不可蠲而代之輸賑濟時不可行而給之  
食其他慈惠之政不可槩舉致人心懽悅天意感  
通兩日來氛祲掃除天宇澄霽施及鄰郡敢昧所  
元敬拜手書殷勤問訊而臘前之酒有以沃其枯  
腸雨前之茶有以滌其滯思空南山之竹不足書  
謝忱但有銘佩某屏居莫聞時事有自日邊歸者  
能言已有明詔趨上周行某無任願忠之情尚以  
財不盡用畱餘力以資代者威不盡用廣遺愛以  
貽方來爲未解印之祝



回宜興謝百里奕修

昨以厚意久不報斐然一箋聊寫寸衷使介鼎來  
雙緘併辱薄物曾瓜桃不直更貽瓊玖之酬陽羨  
之茶天子之所先嘗竹冷之酒中都之所貴重羅  
列滿庭而山海果羞與花縑畫扇又從而侑之拜  
嘉以還感藏無斃往來之人誦賢者平估以便糴  
散藥以起疾慈惠之政次第舉行甚善甚盛紹熙  
間越人俞高兩郎中相繼爲宰創社倉二君旣去  
鄉人徐大夫實繼之徐雖學舍人而識頗不逮遂

徹去人至今惜之至今議之前大夫才足以有爲  
而牽於佛廟神祠之役念不到此絃歌之暇亦可  
略尋墜緒否乎某朋友故樞密羅文恭公之幼子  
曩爲新淦令某爲作琴堂箴或傳至魏華父侍郎  
爲作篆書入石甚佳偶存一本僭以拜納鄙拙不  
笑相望不遠數舍繼此時當奏記或因風問生死  
得略去寒暄頌望等語幸幸

回句容吳百里洪

某憚暑如在釜甑中台翰正在此時來剝封莊誦



炎熱自去清風自生且審當喧囂倥偬中不廢絃  
歌之樂武夫悍將撞搪叫呼之際日與青衿矛佩  
從容俎豆間神之聽之台候動止萬福欣慰其何  
可言某物併貺登拜感甚學記之委深荷不鄙若  
稽在昔泮宮之修鄉校之不毀雖見史克之詩丘  
明之傳而千萬世所敬仰者魯之僖公鄭之子產  
而已某其敢不勉以發揚盛美元符道宮大有興  
作驕將叱咤賢大夫倘唯唯聽從繼自今洞天福  
地雞犬不復得寧猿鶴不復得來木石皆不復得

其所矣幸台座念及之二學記寵教已領闡師老  
丈上梁文筆力猶精健如許敬服因書爲致意他  
須嗣音

夫以二

累日聞句曲之民悵朝天之鳥飛去不畱助之黠  
然劃奉誨函乃知大鵬雖搏扶搖羊角而上猶未  
能忘情於鳴蜩尺鷃不惟自喜且爲句曲之民喜  
二天之猶在其上也某匆匆不及拜水翁大卿書  
會次爲致海內蒼生望霖雨之意胡伯量兄計亦



在大卿東閣數字望爲寄達此去必卽留中州縣  
之不可爲田里之不勝擾固皆身履而目見之言  
有可及得毋愛於言力有可及得毋斲於力是望  
通泰興王大夫論  
某宦海陳人紹熙慶元間尉江寧則知績溪王大  
夫以古聖賢之學行之一邑邑以大治猶恨相去  
遠所聞未詳未幾同年友張右史敏則自新安來  
且言曾親到績溪見大夫所爲皆今世所無有某  
以是起敬不勝區區之情開禧間隨牒東嘉準擬

叩門執弟子禮旣到則甲第在外邑三山非遠而  
弱水隔之惟坐馳此情歸未幾而木壞山頽矣惜  
此世之失此賢悵此生之孤此願今猶耿耿胸次  
比歲鄉人爲簿尉於龜城簿之子歸尉以書來頌  
大夫之賢不容口敬問爵里知爲績溪之嗣其廉  
足以勝私律貪而其爲人謀而忠又有不可及者  
詩曰維其有之是以似之欽歎欽歎王簿子得使  
邑爲其亾翁保明申府申部可徼致任澤適部中  
行下再保明弱子茫然無措某三十年林下與世



關絕復無從致力其子自拜書控慳累日來求書  
爲助義不得辭率易拜此

回新於潛尤大夫

某犬馬之齒入新歲遂七十有一目昏耳聵而胸  
中復健忘凡百皆如冥行以此絕不敢與朋友相  
聞郵置中知己班改且知己注赤邑繼此榮塗足  
可無壅不勝贊喜第修賀不武而爲來教所先物  
之厚意之勤皆非所敢望但有感愧來諭言世道  
之艱且惜諸賢不能相與壯元氣壽國脉誠爲至

論若以爲皆坐相率引避去之惟恐不速之故却  
似未然蓋見可而不進固爲可罪而冒然嘗試以  
僥倖萬一者亦非世道所望也嘗觀自昔事變之  
多莫如漢末而諸賢隨用隨起皆有以自見亦無  
如漢末者蓋當時諸賢相與講之深見之明守之  
固斷然不以富貴貧賤死生禍福入其心故能隨  
遇有立如此某久居田里固罕見士大夫或邂逅  
有見未有不憂家之貧身之不達者切謂吾國之  
士苟有其心於饑寒貧賤而死者則豈惟吾國庶



幾其人亦過人遠矣季端以爲如何西州家學之粹世德之茂惟君一家而昆仲間能以學問相勉以德業相期以聲望相高者亦惟君家耳願益自力以開遠業厚貺無以爲報偶有某物謾以友書來書有秋深過吾里之意拍塞滿懷悉畱面賦來書累幅而此但幅紙又盡略彙儀蓋昏耄有不容強者亦惟眷予是賴千萬矜體

回鎮江權倖史延陵習之

某伏自大丞相當國幾三十年山林閒散之人間

有與大丞相偶同姓氏者輒辟易趨避况真大丞相族耶惟滄洲文昌公昨典鄉郡不以某愚不肖先之以手書某非意望所及且謂庶人召之役則往役其敢辱贈而報自是得以姓名自通其後溧水大夫介一二士友惠書叙述平生有擺脫世務退然以寒畯自處之意某謂是我輩中人非挾貴以來者故亦願交下風今承來翰似事同而實異蓋作小楷書用畫一式則小官事上之禮某不敢當一也以先生見稱以懷才抱道有志當世之士



見待某非其人不敢當二也不敢當者三而不敢不當者一則某郡之民而執事郡之通守也故敢援召役徃役之義修書以謝萬一干將出匣寶氣衝天惟善藏其用毋與牛刀爭一割之快是望

某再承台翰禮愈恭意愈勤而所以開曉之辭愈悉某感甚愧甚懼甚抑某前所作報書實有感於世變而然不自意其有忤於執事也初某之爲江寧尉也故叅政衛公已以大魁爲他路常平使者

其父子文老丈實以朝奉郎爲郡僉幙臺府一待之以巡廊官略不少異一日添倅去官兩倅白郡以衛攝事衛辭以上驕官與巡廊官事體不同又以僉幙以下皆受察之人而通守按察官也何敢當力辭不受帥主鄭知院僑聞之曰吾固疑其如此卽改委帥司機宜今執事雖大師越王諸孫大丞相諸族然年甫三十官猶選人職猶監當旣攝僉幙又兼通守雖大官要職皆君家所自有而某因來翰之及敬讀冰銜回念四十年來事不能不



有感誠不自知其言之過語曰我之大賢歟於人何所不容惟執事有以容之又某所以不能不拳拳於文昌滄洲公以及溧水大夫者某嘉定初年備數浙東鹺幕時大丞相以禮部滄洲以兩浙漕同按視壽成山陵昆仲職位未至大相遠及丞相當國以一尚書處滄洲誠未爲過而滄洲懇辭十數不止丞相亦終不強之故天下皆服大丞相之公而仰滄洲之高溧水之在太學也以大丞相故不得成校定者累年及旣出官循序而進未嘗超

躡得邑山陰棄之而易溧水在溧水爲郡所抑自他人處此干造物求速化溧水終安之以俟秩滿此某所以拳拳二公願執鞭而不可得執事遠觀疇昔金陵之事如此近觀今日君家之事又如此則宜知所處矣詩曰他山之石可以爲錯又曰他山之石可以攻玉蓋以玉攻玉安能有成惟得夫他山麤厲之石相與錯磨則廢乎其可執事無志於西序東廂之陳則已苟有志焉則他山之石必在所取請自某始鄉縣去古延甚近或因還鎮枉



道見過甚幸不然某因謁季子祠亦可求見揮汗  
草草

回真州倅權州鄭運管次甲

某少也爲貧鄙事無所不歷年甫七十百疾叢之  
雖知貴名之起如日麗天而養痾窮谷進謁無階  
又知蕞爾孱生所以得入於大鈞坱圠中而不在  
清議擯斥之數者無非一門海涵春育之賜而目  
昏手戰宜飭一箋以謝亦竟不克俯仰乾坤惟有  
愧忤忽奉華緘粲乎其詞之文溫乎其禮之勤而

意之厚也某何以當靖思惟有歸翰墨於典籤請  
罪戾於司過庶於愚分容可少安或幸而恕之則  
所願也非所敢望也

回艾節幹慶長

某往歲承得得命駕過我漫塘上雖貧居不能款  
然已得意鄉於言辭之表知必非碌碌隨世俯仰  
以就功名者爲吾道賀爲吾鄉里賀一別杜門無  
從上記比江延卿自池陽歸具道得賢使者爲之  
依歸使者亦大得幙畫之助喜欲起舞方將因兒



曹就試城中宛轉附致一書忽令兄專人送至來  
翰且有某物頒貺感何可言慰何可言徐斯遠尚  
友好學安貧守道不愧古人頃歲校文上饒惟以  
親得此人爲喜所惠詩文三冊回思在上饒見斯  
遠時今整整四十年而信上三君子皆已逝矣某  
視昏昏髮種種在世能復幾時不覺老淚之橫臆  
也某少不學中歲杜門養痾復棄書冊不復關人  
世事謂可守此以終老諸賢誤知過相推輓致游  
被寵榮且容臺禮樂之司尤非懵不知古今者所

可進適已力上控辭之牘且以書致禱于一二親  
舊期必得請來教實獲我心敢不敬佩聞考試後  
必歸更喜有承接之便他得以略令兄承賜書已  
別具答秋色正佳賢者在道固應動靜有相萬福  
來同更相寒暄之宜劼茲茵飪之奉是祝

大論回滕主簿嘉

經年之別無非思見君子之時伏奉手書禮過乎  
厚若施之所尊敬者某衰晚固陋不足當但深感  
愧就審秋來行李有相台候動止萬福慰何可言



某昨聞東裝過淮西意須少畱何歸騎匆匆如許  
某平生知舊十九皆爲淮西羅致迎之敬以有禮  
知舊間多不敢違然到未久輒去今詳味道間兩  
大篇雖意別有屬然浩然之略亦於此見之詩曰  
彼求我則如不我得執我仇仇亦不我力史稱孔  
北海造次能得士心士久亦不願附豈其然耶勿  
止二字一是聖學之門一爲聖學堂與止者至善  
之地不可以有加矣勿之後工夫甚多方到得此  
地來論所謂資勿之義以止其妄竊謂未然人能

止於至善則妄去久矣如何如何需趙婺倅書緝  
去其姪安吉大夫前月末一疾不起可傷王山陰  
到官數月上官甚相知然亦窘於酬應相坐不得  
嗣音冬仲能踐踏雪叩門之約幸甚東歸猶有餘  
暑道間厚自愛是祝

回新武進張尉



某日向回舟於綠蒲青葦之間謂謁入必在他客  
先忽奉誨函恭審已拜除書端歸錦里林泉改觀  
門巷生輝台候動止萬福某四十載硯席之舊慰



浣不勝情惟偵伺不敏亦重自愧也仰惟尊友兄以絕羣之才負邁往之氣揮毫落紙正聲足以諧韶濩高韻足以激天鯨宜紬書東觀載筆掖垣皆榮塗發軔之地顧俯就警曹奔走之職自取廉矣夫惟取之者廉而後與之者過金沙鷓鴣之祥自古有之某願拭目區區王陽結綬貢禹雖不復作彈冠想而竊效其喜有不容自己者未辨一物薦賀而厚貺鼎來先施之道至矣盡矣某何以當但有悚荷暑月未敢掃門以速褫襪之誚敬以儼高

明之居謹締綌之御爲侍介者請

回趙御幹

自居田間聞人從日邊來卽目動神駭而左右方影纓其間那敢上記但有懷想張壻遞到來翰諄諄然如小官事上位非所望於親舊也伏審炎夏之月忠勤有相尊候萬福至以尉爲今世士宦頗難西班尤不易必得貴而賢者主之庶易爲力今左右真得所依矣某病容衰鬢視向來十餘年前相見時更覺醜惡又賦性疎率仕宦處雖爲君子



所知然亦爲小人所惡故浩然歸志遂不可遏方  
來歸時錢丞相衛大叅秉政欲以掌故相處命且  
下矣某辭以自屬官得掌故人必以爲入京考圖  
而後得之不若且昇獄祠異時陶鑄未晚荷三公  
相許以二月八日奉祠歸歸甫兩月以四月八日  
降堂審之命明年又荷廟堂具未赴堂審之人姓  
名行下催促某以賤疾形於面目不可復出遷延  
至今十九年方初歸時鬚髮未有一根白今無一  
根黑矣豈有血氣盛壯時不出及血氣旣衰乃可

出乎傳聞大叅屢借助於丞相之前不知山林之  
人何以得此竊料大叅以一世風俗爲已任惡世  
俗之貪求以某粗無求於人故見取耳然世間無  
求於人亦有兩似有可爲世用而不屑求者亦有  
目知其不可用而不敢求者若某真是自知其不  
可用故甘心屏處吾親因職事之暇千萬爲大叅  
明言之或強之使出旣無以愈人又不能謹言寡  
過必爲大叅門墻之累免牘再上其間語言狂僭  
物論必是沸騰山林之人安識朝廷事體肆意極



言那得是處却望大叅覆護使不至得罪舊作三  
篇因寫與王大監令女夫錄一觀數日來方劇暑  
都下想見尤甚千萬厚愛

通胡伯量

某入秋伏暑傷脾正爾悶悶而聞前句容吳大夫  
行不及端狀令親敬予文平生自養有道想亦未  
料其遽至此故家事俱不遑區處頃見契兄說敬  
予二子非同生故其閤中不能槩視之今其親生  
之子既爲門下壻則協和內外使四方朋友無得

而議全仗契兄與令女千萬勉之某鄉間社倉稍  
稍整齊聞朝路中時有議者今見在米本不能數  
千石而論者已謂其多深恐小遇水旱必有科擾  
之患小蟹莊比來如何石已至否因風毋惜寄音  
以慰牢落

不須回輝上舍

相望百里而數十年來往鄭鄉無一日雅人事好  
乖可歎也忽奉長箋幸賜之教莊誦欣快來示窮  
達之辨詳矣某行年六十寧不之覺然某庸人也



善其身之不知欲兼善得乎執事之論某懼不敢當也抑某所聞有身之窮達有道之窮達古之人固有飯蔬飲水樂以終身亦有曳紫紆朱戚然若不能一日安者窮達果安在哉執事有聲太學三十年猶授道里門所謂先生之門必有尊足者存某雖病且老尚受教焉脾泄幾月方小愈羸劣執筆猶戰掉且此奉答

回湯德遠

二月初省母舅於丹陽歸拜兩緘之辱知事不待

報而決因循不上記寒食後刊字戴生過希墟念端便不可失卽草一緘奉酬仍作得數字問訊晚秀王翁旣授戴生一日見其言將有禱於執事求售其技因爲之言吾書非爲末藝爲先容者遂索回昨過雲邊亦念別遣懶與性成得已又已當處之世法之外然世益薄交益難聲氣之同操尚之雅如執事者里中實不多得詩曰心乎愛矣遐不謂矣中心藏之何日忘之實寫此心也鼎來真翰喜審暑令權輿朝來尊履有相萬福臨川唱和帖



得見前輩風流使人歎慕端研小而佳拜受併爲  
陋室之光朱氏書須併中庸章句或問連得兩本  
乃今尤郎中刊于衡陽及楊通老郎中刊於龍舒  
者亦看得一過今以龍舒本同來本納呈恐欲較  
同異倘無差誤却望以今所納本示還蓋欲以示  
兒曹故也朱氏書年來盛行今立要津者多自謂  
常登先生之門承先生之教而趨鄉舛差尚多有  
之使人嘆息諸書惟近思錄尤切於學者日用頃  
得數本皆轉授學者今餘一本殆不可輟度晚秀

必多有本願以一二置申義齋中與學者共之或  
無之却幸見諭一朋友處有之當求數本去申義  
規模當已立其以丹陽趙令托求真清二字於能  
書者字須大八九寸欲望一言於晚秀爲轉求此  
二字不應轉托人渠意蓋只欲以自警此亦勉強  
爲作數語繫其下不敢爲銀鈎鐵畫之累也其近  
得足疾一向不可對客日事藥裹披紙若蠹魚然  
竟亦何益無從晤對惟力學以昌斯文是祝

回士友

忘其姓名



某從里中王去非游知執事好古學行古道自期以古之人願見無從心如懸旌無所終薄忽承不鄙衰陋遺以論心之書感甚幸甚就審秋來味道之腴起居住佳適欣快不可量也世道既降中行之士益少世間一種立仗馬轅下駒置不足道東京諸賢視此身如秋葉而欲手援一世之溺斯亦奇矣然夷攷當時大率聞風景慕率意行行少有長慮却顧相與切磋如聖門所謂臨事而懼好謀而成者則後日之事亦非專彼計之得也某於執事

無一日之雅而來翰之頒便欲使效其區區之愚此道甚古此義甚高某不肖何足以當抑嘗讀郭林宗黃叔度傳似有契焉欲學之未能也不識意以爲如何聞田園僅自給度稍加經理必可有裕前輩風流不可及然到叩門乞食處便覺氣象衰索要須不到此地乃爲得耳如何如何古詩努力崇明德皓首以爲期謹誦此以代節宣之請

回項宜父

兩地相遠別日已多宜父日游京華徧交當世知



名士猶不能忘情於某專書問訊況某屏居田里  
海內知音有幾其不能不拳拳於宜父可知也伏  
審冬來行李有相尊候萬福欣慰之至示教擬古  
詩視向所示諸作更覺渾成無模倣痕蹟自此當  
盡棄晚唐之習如何如何陵陽先生誌先公墓筆  
法嚴整令人敬歎先公真不死矣可爲人子賀令  
親武進大夫賜書且示先令姊安人誌銘板本竊  
意大夫非無力刊石者而委之盈尺之木似亦有  
故故夏兄書中云云外此別無聞幸悉及來書謂

嘗惠報濮氏事都未曾領試詢之遣貺青楫猶記  
在稽山時故人謝古民專人致此今拜所贈不但  
感德更深懷舊之情使回謾有某物寄意勿笑寒  
陋會武進大夫爲致下誠胥會邈未有期爲斯文  
勉旃是祝

二

某聞嵇叔夜謂素不便書性復懶作書以此得罪  
於俗某辱書諄諄所以見推予甚至而率略具報  
其罪固宜所恃者執事非世俗之人耳聞常過令



親處令親道相同居相近其來往之頻固宜他亦有密友否士生一世苟知識稍異必不肯與草木俱腐況如執事之明爽非餘子比願言勉之彼官高位尊世俗最貴者非良貴也願言審之希孟謝丈少時實有英氣不幸爲利欲所昏浩然之氣弗克而專以血氣從事故多不滿人意然其天分之高亦非他人可及晚節如此家事又如此令人太息或其遺息尚可扶持者惟鄉曲念之相望千里古詩所謂道路阻且長會面安可期惟愛厚以昌

遠業是望

回朱丹陽令嗣

某林下殘生於君家無一日雅先大夫來拊吾邑某家金壇亦未嘗有毫髮相關前之日率爾數字特爲鄉曲發且痛天之不右善人賢令長之不得志於斯世云爾裁謝諄諄非所敢當也釋氏說入中國老子之徒效尤喪祭禮大壞仙里儒先之所講明如揭日月君儒家也所以葬其親亦必有道矣其忍以有限之財供無益之費乎夫生者須養



漫塘文集卷之六  
死者須葬二事重輕略等而君家上有重親有諸  
父則養生又其難者惟精思而謹行之正寒扶護  
載塗惟抑哀自愛其無從面致臨紙拳拳

回陸秘書令嗣鎮

某頓首再拜秋序方半風露淒清伏惟綵衣容與  
綸誥方頒尊候神介萬福某已於令伯朝奉丈令  
兄判院書中致不敏之謝不復喋喋共聞大君有  
命以先正安撫秘書盛德在人祿及不嗣爲明時  
墜典特頒渥澤以旌象賢凡在識知同深抃蹈敬

惟太夫人幸榮塗之有子年家契喜祿養之及親  
俯仰之間歡慰無極惟公家世德之厚家學之粹  
倍萬他人更祈不自滿假而求師友之益不徇尋  
俗而探聖賢之蘊遂踐世科益開遠業不勝頌望  
侍堂上太夫人告拜千萬意不宣

回湖南陸提幹前

某年衰志懶至契如公家亦曠不修問惟有馳情  
忽奉專教驚喜折屐就審春事向闌天宇清淑卽  
日蓮幕須才瓜時趣上神職後先尊候動止萬福



某托契雖厚而會見無從願交雖切而款承則未  
故於德履之粹才業之茂皆未能盡知所知者辭  
婚趙氏一節非立志之高守義之固疇能及此不  
勝敬歎更在謹擇師友明辨義利視初節有光于  
以一洗年來淫侈汙濁之習是所願望湖南帥余  
丈簡嚴可敬一見當刮目某雖聞其風而悅之恨  
未之識故人林自知爲湖南酒官在其幕下因見  
爲致意此兄亦好賢樂善必能爲余丈處先容也  
度此去便爲榮改計然榮進素定要不在過於營

求居易以俟命自有知己者寵頒珍腆僕僕亟拜  
無任感刻索居謾有某物寄意非所以報瓊施愧  
當如何語令姪不及拜書怡集爲引誠豚犬輩各  
上起居問某年迫七十目昏手戰不復能楷書故  
不及視來翰以報千萬賜察道間厚愛



漫塘文集卷之七

宋籍男啓添差通判建康府太常寺丞竇顯閣主簿高觀漫塘病叟劉學著

劄子

上史丞相謝除籍令及改秩添倅

竊以季秋謹時天宇澄穆恭惟某官功在社稷澤

潤生民一德格天百神受職鈞候起居萬福某山

林賤士望光範門邈在九霄間欲以姓名自通厥

路無繇然一氣均調萬彙咸若孰主張是孰綱維

是其粗有識寧不知歸仰惟大丞相獨運化鈞協



成乾造親扶日轂直上天衢使四時調玉燭之和  
萬國仰金城之衛宗社幸甚海宇幸甚某愚不肖  
少雖妄意事功中年得疾自放於山巔水涯聖主  
龍飛善類雲合某雖頽卧亦躍然而喜願與扶杖  
癯老遊遨嬉戲共觀德化之成不自意身亦在獎  
拔一人之數既陳情引避至再至三復使驟脫選  
階躡佐大府此事於國家爲曠典於士大夫爲創  
見於某爲非常之遇不世之幸盍卽祇拜以贖前  
來方命之罪且勉自奮勵以副大丞相特達之知

而骨寒命薄病不可強夷途當前自繫其足惟大  
丞相推天涵地育之仁深哀而曲貸之某得全其  
疾病之軀而遂其丘園之性實重受生成之賜身  
雖九殞其何敢忘抑聞施必有報物之常理某病  
日侵年亦邁而往自度終無以自見獨有私憂過  
計或可禪議論之所未及欽惟大丞相於先越王  
秉國鈞軸其位遇同輔道先帝翼贊嗣皇其眷倚  
同先越王再處台司不俟溫席晚歲駕安車策靈  
壽杖爲孝皇一出天下顛顛謂且留相天子曾未



幾時卽榮袞繡之歸是以福祿壽考極於人臣德業勲勞傳於子嗣今大丞相弼亮兩朝十九年矣而不敢一日失此重負自同於先越王何哉豈非以勲名已盛權勢已隆欲奉身而退不可得乎某竊謂爲此說者左右前後自爲身計者之謀非所以爲大丞相計也大丞相爵賞之用無黨無偏刑罰之行無怨無惡尊賢使能不驕不吝故在位雖久而上下未有厭斲之心一朝褰裳而去主上必曰是嘗建大功定大業禮貌不可以不隆公卿百

執事亦曰是嘗持國家紀綱守朝廷法度待士大夫以至公無私禮不可以不厚恩誼終始身名兩全當世之士必有能作爲歌詩頌贊寫之琬琰繪之縑素使萬世之下歆艷歎慕以爲不可及者又何疑焉今議不及此而惟徂目前喞然忿異議之來而幸其同則止戚然慮事變之作而幸其平則止縻之以爵祿而恩意有時而窮壓之以刑威而勢力有時而屈防之以知術而事常出於意料之表當是時左右前後之人志得意滿皆將自擇其



身之利而大丞相獨誰與同其憂乎某病廢以來  
得自適其適雖無爵位之安而危不迫其身雖無  
富貴之樂而憂不入其心每願持此以獻於有位  
者而無其階伏念左右前後之人希容悅者多能  
不逆畏其忤而直致其辭者寡輒因叙謝裁具短  
啟申獻倘幸置坐側時一覽觀以致其思是大丞  
相拔士疎賤不爲無益某受大丞相超擢之恩不  
爲無報不然異時追憾左右之不能盡言某亦自  
悔其不及言無益矣是以不量位分罄竭愚誠大

丞相果能從赤松之遊尋綠野之勝從容天台四  
明之間以訪先越王經行之舊某雖衰疾不任衣  
冠猶冀幅巾短褐拜謁道左以自附於賓客之下  
陳不勝愛助之至若乃言不成文書不如式則野  
人之常併丐矜察之

二謝除直秘閣宮觀

竊以來鐘氣應玉燭時和恭惟某官對敷顯冊增  
煥泰堦喜溢神天慶關宗社鈞候動止萬福某林  
下殘生故歲輒不自揆因奏控謝牘敢述其食芹



之美暴背之溫九頓首獻之黃閣之下自惟狂僭  
宜在誅斥之科大丞相不惟赦而不誅又從而賜  
之答若曰余惟汝嘉而不汝尤夫易之舍洪光大  
自是大丞相盛德書之翕受敷施亦爲大丞相餘  
事某不足當但有感懼自爾累月不敢徂僥倖之  
福以爲常嗣有塵瀆歸心元宰實與海內含生受  
氣者不殊茲審策蓋代之勲進師垣之貳使是君  
爲堯舜固大丞相平生之盛心學焉而後臣之亦  
明天子今日之所以聖旣道備而實與名稱宜命

出而雷動風行仰惟體貌之增崇可但君臣之相  
悅某惟當世載筆之士甚衆當有作爲歌詩播之  
樂石者某老矣短啓一通少伸燕雀之誠幸賜采  
矚某一介庸陋昨由州縣之隸而列屬容臺由今  
錄之資而躡丞大府與脫身選調賦祿祠庭皆委  
曲以便其私超越以爲之寵一出鴻造不候請祈  
某非死灰其心槁木其形寧不知德惟是中秘寓  
直朝家所以旌外庸某疾病之餘且甫茲更秩其  
敢冒居已瀝愚忱再乞寢免終冀矜從天時之律



不當請於寅亮燮調之地屏內之間不當發於寒  
遠疎賤之人於前爲瀆於後爲僭懼二罪不敢自  
同他人仰乞矜體

三辭直秘閣

竊以孟夏謹時恭惟某官弼亮再世勲勞百爲惟  
帝念功惟天佑于一德鈞候起居萬福某昨不自  
揆輒因顯冊之頒飾其固陋之辭爲宗社賀且以  
申致寢免誤恩之情竊計容光必燭寧此獨遺月  
律屢更巖瞻惟謹仰惟大丞相以海宇安危爲已

心以人才消長爲已任其抱負所長于于然而來  
者旣已盡寘之周行其窮而在下者復不欲其老  
死於溝壑振而起之如某之愚亦與一人之數則  
賢於某者可知矣粵自去歲四月叨恩除授展轉  
控辭倏已經年最後辱察其病之深才之無所用  
授以祠官使自放於山林華以貼職使自別於閭  
里朝家之恩意至矣盡矣若固執其愚不思所以  
仰副造化曲成之意某則非人謹已望闕遙謝祇  
受奉議郎主管仙都觀恩命訖惟中秘寓直實非



乍脫選調素無朝蹟者所敢當謹復昧死具申期  
必得請伏望鈞慈賜以開陳卽垂矜允四明山水  
勝處平泉之嘉花美木列植交陰皆欣欣然若有  
待晝錦焜燿此其時歟某病少愈猶能手種樹書  
躡青鞵布襪聽役於長公少公之間惟所以命  
賈公答鄭丞相謝除常丞

季秋謹時恭惟某官器使羣工陶成萬化誠通穹  
壤喜洽神人鈞候起居萬福某一自屏居田里混  
蹟漁樵平生故人位稍通顯則引分不敢相聞其  
敢以疵賤姓名自通於光範門下頃飭箋稟謝蓋  
如時鳥候虫感天地發生之恩不能已已大丞相  
微小不遺如響斯答區區之愚猶以是爲景星慶  
雲適爾臨照非可屢得乃今幸會又過於此夫公  
卿不揖客將相不俛眉舊矣况當邊鄙未靖甲兵  
之問日至而大丞相獨運化鈞固應自朝至中食  
息不暇顧於三接之餘親灑五雲之翰以光於華  
門圭竇衰疾無能之人竊惟盛心何可近論昔人  
以千金市駿馬之骨而千里馬至者三某衰疾無



能猶之死馬何所論報竊意當世之士抱負才能而考槃澗谷者必有聞風而起爲明時用某故不敢私爲一已賀爲天下賀某蚤歲爲士不成去而爲吏爲吏不成歸而爲民學農學圃均之無成安能知當世之務今殿中王御史密院尤檢詐皆與某有宿昔之好侍郎度公尚書李公陳公某同年進士故潔齋袁先生嘗置某薦士籍中於今京尹袁公爲乃翁門下士故六七君子過相推輓以致其親舊之私情言多溢美惟大丞相察之某比拜

鈞翰復承鎮江府備坐省劄發到轎乘人從等且委官及門趣某起發此昭代曠典尤非某所可當卽具公牘發回本府且具行申省外伏念某少更艱苦晚景百疾交攻目前最苦腹臟之疾日三四作今畏威懼罪謹作急治療稍遂減可卽星夜奔走赴闕抑恐薄命迤邐溘先朝露無以伸絲粟之報有孤洪造敢及稟謝先陳其愚某聞帝者之盛莫如虞舜虞舜左禹而右臯王者之盛莫如成周成王左周而右召下至漢唐亦惟蕭曹丙魏房杜



姚宋兩兩相承號稱賢相餘子不與焉豈非天下  
至廣萬幾至煩非一相所能專任歟恭惟大丞相  
以講學輔主上續道統之傳以勤勞佐主上復基  
圖之舊其精忠可以貫日月其純誠可以通神明  
固非漢唐諸相所可望直與禹臯周召同科而自  
爰立以來揆席猶虛其左或謂大丞相之賢不欲  
名位之加於前或謂大丞相之謙常冀後來之居  
其上或又謂論相人主之職非大丞相所當言當  
自主上發之或他人啟之其竊謂此意發於主上

則為意向有他委任不篤發於他人則為讒為間  
惟發於大丞相則為中心之至誠天下之至公而  
狗左右之言則不能發顧目前之小小利害則不  
能發惟大丞相卓然奮高世之見不為左右之言  
所牽不為目前小利害所汨則庶幾禹臯周召之  
勲名復見今日某儻尚不死則殘年餘日無非效  
死酬知之時不然則犯不貫之罪不以誅死亦且  
憂死矣惟大丞相念之昔人謂寒日邊擊急此惟  
其時正諸將敗軍之罪恤沿邊征戍之勞以警其



餘以固吾圉以輯天下安靜和平之福此通國所  
望外此不敢私致頌禱仰乞鈞照日

通王中書

竊以卽日風蕩井梧香摧籬菊恭惟某官經幄籌  
帷日承清問道山詞掖總領羣英天佑斯文台候  
動止萬福某近者以傳聞未審難於修書專介上  
叩卽辱賜答不但感情誼之厚且歎服精力有餘  
酬應不倦如此舊見一故舊爲執政者方作縣時  
目已昏及在給舍夜讀錄黃及書細字不難又午

間倦甚必伏枕移時後或連日夜應酬不曾假寐  
今觀門下精明如許信其言不妄豈悼亾以來獨  
處之力耶抑天實相之也村僕旣回郡中亦專人  
送至差劄使君書來甚勤妄意有自某不勝駭某  
本辭籍令而遽得丞郡本在七階之底而躡官陞  
朝金陵留都家山便道恩意之厚復無前比一出  
裏言之助何以辱此感不容言但其病旣不可強  
而義亦非所安只得懇切具申萬望致曲使卽遂  
寢免毋致再有行下使喋喋不已坐罪不測某靜



思今世士大夫旅食京華日登光範之門欲陞一  
階一級而不可得者何可勝計某何物小子乃爾  
僥冒叙謝之書若自同常人一於道古今譽盛德  
則是亦常人爾無乃孤非常之遇乎凡齋心兀坐  
旬日而後得一啓一劄致謝之外並不敢及時事  
只論出處進退之義啓中猶援一二故事劄中只  
以丞相先越王爲說旣成焚香告之天地而後敢  
發區區只冀萬一有所感悟切計書雖未到先越  
王在天之靈則已知之前承許爲轉達自揣非台

坐亦莫能達謹併申省狀控免得不斥去實受成  
始成終之賜區區無一物可寄意專人過茅山買  
得少芋栗包裹將行村僕慍見曰毋徒使我負重  
而取笑於闈人卽收回芋栗而語村僕曰爲我致  
意闈人以中書之門而有送芋栗之客又併芋栗  
不敢遣顧不偉歟村僕莫曉因自書其說於書尾  
以資一大笑嗇神養性之說門下已自得之亦不  
敢贅村僕回時只求涓史一批收切不煩染答也



竊以隆冬北序一雨生寒恭惟某官主持國論振  
起朝綱宗社儲祥台候動止萬福某近者介恃眷  
予喋喋干溷雖山間芋栗亦恐累清德輒不敢遣  
村僕之歸辱賜真染先事而教誨之至周至悉重  
拜川附之貺使孱弱之軀賴以少延以愧以賀繼  
又於遞中領所賜教及丞相答翰知中書忠於爲  
人終始不渝大丞相寬以逮下賤微不棄尤極感  
歎某三十六年選人六十歲老翁分席漁樵已二  
十年豈復有榮望一朝自天有命使不用舉主而

官陞朝不歷親民而佐會府此國家非常之恩大  
丞相特達之知中書推轂之力某寧不知德而牢  
辭不已者實以某命薄數奇性復多忤所合飯蔬  
飲水枕石漱流不與世接猶惴惴然若薄冰之履  
一朝出而裹章服事上官與聞民事有多少意外  
况所感風毒之證漸類惡疾非復頃年侍教時比  
陳居士備見之以是只欲終老田間爲太平幸民  
已再寫成祈哀丐免之牘而朋友見責以爲君相  
知憐之意如許中書所以開曉之者又如許安可



不略致委曲以是又寫得一狀并以申浼欲望中書悉爲過目賜之區處若見得丞相能洞達此心不以牢辭爲忤則望竟爲上丐免之牘或覺意有未順則且以後狀致訪醫之請庶目前不太拒違三兩月後却可從容布露惟中書推成始成終之心爲深思而審處偶得古銅小香爐一枚拜納庶幾釋氏辨香之敬或有以金視寶鴨獻者願舉此故實以謝之趙玉父監鹽歸言朝行中不受餽遺如中書者僅一二數尤使人欽服寒事方來謹上爲世道壽重之祝

回王中書簡人

竊以一陽將復愛日如春恭惟某官羽儀禁從黼黻皇猷台候神相起居萬福某比村僕回及遞中連辱寶翰之賜方愧稟謝無階專使及門重拜真染辭意懇懇無非曲爲某出處地古道不行久矣士大夫已致身華要其視山林賤士何有而中書獨拳拳如此此古人盛德事不謂某身親見之頒示省劄及告命其間勸勉之勤獎予之過皆出一



力某非木石其敢忘之抑有危迫之惘不敢不預  
稟某昨屢勤朝旨之頒恐悚不安因自思疇昔叨  
堂審之命而引疾具申乞且就醫候痊可日起發  
其後疾既不痊遂得迺遷幸免近者再做此意申  
上一是仰承約束不敢直截致辭以孤造化美意  
二是此狀別無施行謂可留在省中不再行下不  
謂給假一節反自趣期會渴命震灼寢食爲之不  
寧所恃中書如二天在上能始終全覆之所有  
告命既未敢祇拜謹且寄留縣庫若賤疾果有去

除之漸而敢執迷不卽敬拜君命則是禽獸之類  
無君之人加之斧鉞付之鼎鑊夫亦何辭萬有一  
疾證果不可療亦望中書庇覆朝廷哀憐由賜從  
欲喋喋干冒聽嚴正猶嬰兒不能不用情慈母併  
惟矜炤六氣之運中書實贊燮調不敢贅上節宣  
之祝

二

竊以比辰五雲呈瑞化日迎長恭惟某官仰稽天  
運以贊皇猷使衆正朋來羣陰斂退熙然六合同



漫塘文集卷之七  
此泰和台候神相起居萬福某竊伏田里無由陪  
賀客下陳鄉風謹上千歲眉壽之祝濟獄已竟正  
朝廷力行好事之時向來施行太過如胡評事等  
事宜亟有以轉之在中書良易耳某區區出處辱  
中書介念前者使介之回具謝草略詩所謂中心  
藏之何日忘之賤疾所當用去風之劑比圖速效  
服涼劑太多反傷脾胃日食無幾氣息奄奄大懼  
有孤推輓之厚意小須假滿續具申稟今因里中  
趙玉父鹽場行先此控露萬一

通王中書前入

竊以歲華薄晚物意回春恭惟某官總運籌籌筆  
之任推陳善閉邪之忠羣聽具孚百靈森衛台候  
動止萬福某比因里中趙監鹽行附貢一箋計已  
呈徹不嗣敬又踰月奎壁之光下飾萬物昏旦仰  
瞻士大夫平時局於職分嘗抵掌扼腕悵有懷不  
申中書今以心膂之臣而居喉衿之地經帷籌幄  
機庭宥府皆得歷階而上攘袂正言必不忍唯阿  
時好浮湛流俗使百世之下有所追憾某愛莫助



之徒深頌望區區之蹟自十月之末拜給假將理  
之命卽遵稟日事醫藥緣所感疾多用涼藥服餌  
稍過幾墮鬼錄亟服溫劑僅可少延然悴乎其容  
羸乎其軀不復可仕矣骨寒命薄言之於邑緣假  
限久滿迫不得已再以狀具述控告伏望哀憐委  
曲借言於化地明其本心非敢固爲沽激許令守  
本官致仕或未忍終棄則且畀一獄祠實受終始  
生成之賜某本候開歲申稟以狀中所述非達官  
歲首所樂聞故及歲未盡因里中符尉到選附呈  
以命

回王中書

竊以陽春布澤萬彙欣榮恭惟某官主盟國是對  
越在天天棐忠忱台候動止萬福某一自符趙二  
友之行再貢稟謝劄且致懇悃不嗣敬又已閱月  
時時尊慕矯首璇霄見奎壁之光爛然輒以自慰  
伏承專使頒示省劄且賜珍染所以開其未悟誨  
其不及者纖悉曲盡中心藏之何日忘之非筆舌



可狀改秩予祠之命雖非所敢當敬遵來教不復引辭中秘寓直朝廷所以旌監司郡守之有勞效者其實何人而敢冒此藉有趙昌父例某寒鄉晚學豈敢望昌父萬一申狀中字字真實不敢飾偽得更借裏言之重卽賜矜允使不至有再三之瀆幸甚故臘有雷野雉皆驚今二月旦日雷雪交作雖不知其占何如然要非祥瑞亦必有爲而然中書於丞相情分至厚宜有以佐之乘此一反前事順人心以回天意不然異時小有不至或者不能

無歸咎也中書愛其異於他人故其所望於中書者亦非他人比伏惟勉之則某與海內函生均拜大賜不啻於薦引除授之私也某狂率死罪

通王中書前人

竊以春序強半花事方殷恭惟某官舉國宏綱納君當道好是正直通於神明台候動止萬福某與樵夫漁父含哺鼓腹於山巔水涯時時自思吾輩所以自適若此非元凱承華勲之故歟旣以生斯世自幸又以嘗執鞭自喜忘其身之遠別之久也



此飾一箋謝專使之辱言不盡意後旬日方作得丞相啓劄各一通內劄子欲見感激之真情手自書寫放蕩之餘筆縱字大惟丞相以情亮之以度外處之不然適以慢易速戾矣某世念已空貴賤榮辱皆非所計然前日寵數之超越恩意之委曲丞相之施於某者固厚而中書所以推輓於前後維持於左右者至矣某非木石也寧能無一語以謝亦旣裁成短啓又重自念中書不以衆人待我我之自處亦安可自同衆人故雖成不遣昨納紙帳嘗口占四句匆匆失於寫去又頃辱賜草堂詩不勝敬歎以陳居士未行竟不曾和納併錄去幸資一笑但恐心地清涼之句旁有顰蹙者爾叔全國博爲況佳否學省雖清華恐不療饑亦可把一麾去否會間幸致意足繚村市目環四壁無一可薦誠者鄉醋家釀各六尊拜納酒味薄而苦必非新賜黃封比却真是無灰可以入藥

二

昨村僕歸旣拜答翰之辱且領珍餉又知村僕旅



食之費悉出宅帑不勝愧感不上涓史敬又再閱  
月仰止拳拳夏五書月南風薦涼恭惟某官羽儀  
禁從振起朝綱台候神相動止萬福某聞天之於  
物因其材而篤焉某當強仕之年而厄於疾拜起  
家之命而厄於行傾者覆之時乃天道獨主張之  
維持之使旣壞而成旣枯而榮是天之所難乃中  
書之所易某之幸大矣感當如何但貼職一事終  
非乍離選調素無勞效者所敢安公狀再有干瀆  
伏望哀憐於化地一言述某真情質諸天地鬼神

非敢毫髮矯僞特從所乞以安末路不然於所不  
當受而受是身外之榮曾不足以蓋中心之愧一  
時之幸且將爲無窮之羞惟中書深念之所有奉  
議郎主管建昌軍仙都觀恩命已照前申望闕遙  
謝祇受訖示教具單劄謝丞相謹遵稟親自寫去  
望借一介併申省狀送似參樞向未嘗通名今亦  
以短啟致謝伏恐欲知選人印紙向以收藏不謹  
已批壞今僥倖陞改已是過望豈敢更求改給切  
不煩介念里中符丞歸能言中書自處不異在縣



齋草堂時雖服食器用亦無所改貴而能貧使人  
欽歎中書清儉既本於天資又眷集不多生計所  
須能幾凡百省之又省使斯世仰之如一段清冰  
在凝風寒露之玉壺顧不偉歟區區願望

通王侍郎前人

竊以孟冬之月和氣如春恭惟某官對揚新渥領  
袖禁途天佑斯文台候動止萬福某近者恭審釋  
內史贊書之煩進天官冢宰之貳紀綱立而吏知  
所畏衡鑑公而士得所歸凡在縉紳同深誦詠某

疾病餘生雖不復作彈冠想然爲天下賀不知手  
之舞足之蹈也惟是累月不上涓史敬非山斗之  
瞻有時間斷道行乎朝廷與身安於巖谷者情雖  
同而分有異不敢瀆爾當沐矜照士之得時爲難  
得其時矣以得位爲難侍郎當明良會遇之時而  
居朝夕論思之位宜有公正之論深長之策爲國  
家祈天永命之地某疎賤他不當言竊惟今之世  
君相之所舉行無非寬大之政公卿之所建明無  
非忠厚之說而郡國之政一於聚斂其苛細如牛



漫塘文集卷之七終  
毛迫急如星火豪奪同乎寇攘巧取甚於販夫販婦其求之廣獲之豐宜帑庾有贏足爲方來之備又往往朝夕凜凜有不足之憂不知何故深恐一朝有警此輩身謀不暇何暇爲國家計惟侍郎深念及此言之君相有似此等處早爲之處無使其他日冒知言之名天下幸甚某以受知異於他人區區圖報亦當視他人有異輒因賀牘僭致愚忱覽訖卽付丙丁是望外此謹上爲國壽重之祝

漫塘文集卷之八

宋籍男啓添差通判建康府太常寺丞直顯謨閣管玉局觀漫塘病叟劉學著

劄子

通知鎮江傅侍郎 **伯成**

竊以季秋之月金氣高明恭惟某官守國要衝寬上憂顧神天協相台候動止萬福某草茅下士昔歲隨牒稽山適際建臺獲陪下走方朝家頒一禮之書當路上三人之薦萬目盱盱視予奪爲榮枯其實何人獲塵奏牘國士之報於今拳拳顧事與



志違懶與病會一歸養疾三易歲華中間審聞制  
闡政成形庭趣召遂由農扈進長諫垣道之將行  
其甚爲當世喜旋聞進貳春卿出鎮南服道方行  
於天下惠復歛於一州某又爲當世惜其喜其惜  
事公平當世而不私於一人故不敢修辭以自別  
詩曰高山仰止景行行止又曰中心藏之何日忘  
之某於侍郎有焉鄉郡荐饑民不聊生上心惻然  
更選良牧鼎來千騎懽動列城矧嘗受知曷勝引  
領而登門之敬闕然竿牘紆誠亦落衆人後擢髮

數罪猶懼有遺然區區之情則有可諒者開府之  
初羣聽所聳而某以門生故吏飛緘納謁與有位  
者爭先或侍郎未忘疇昔借之色辭則觀聽所繫  
或非屏居者所宜故逡巡畏縮以迄於今政令已  
孚規模已定方敢徹姓名於記府仰惟侍郎宗主  
斯道劑量人物方如匠氏之制木不加櫟杜以斧  
斤如單父之觀魚不取陽鱈之迎吸某之不敏尚  
庶幾在寬假之數不然某戮有餘也何敢自貫直  
道致身而不爲權勢所屈正色立朝而不爲高爵



重祿所餌侍郎之事偉矣建寧之行謂爲錦畫之階猶俯焉爲此來豈以北府地重年來事力彫弊不欲辭難故耶下車以來已逋賦弛權禁薄征省繫古循吏之政略已舉行矣向也旱荒連年道殣相望今家有餘廩禾已登場婦子寧止室家溱溱召和致祥繫誰實爲之千里受廛式歌且舞某邕角侍先君筆耕以糊口一第二十年銖積寸累乃得田三頃先人棄世悉舉以授兄弟浙東之歸復買田百畝於是仰以自給雖故歲之旱亦免啼號

之患惟是疾日侵學日落志日頽已定交漁樵不復可與縉紳齒有負推輓之初意以是自愧雖然侍郎之門固有尊足者存豈屑計不全足者哉度報政之後卽爲入覲之計某是時或可陪父老送別謝賜於丹陽道中尚遠參承敢上爲世道崇重之祝

回知鎮江史侍郎

**彌堅**

竊以恢台之月晝永風清恭惟當上北顧守國要衝善政致和高穹錫美台候動止萬福某一介賤



士賦分涼薄得疾膏肓意氣消磨漁樵混迹聽輿人之誦以爲昔有沒世不決之訟今剖析無餘昔有數科并催之租今蠲閣殆盡綱目張而官不敢慢防禁嚴而吏不敢欺姦猾有所畏而不爲善良有所恃而不恐皆舉手加額曰不圖今日復見古循吏之政某幸生其間甚願率先鄉人謝賜黃堂之下而賤疾有加形容日惡雖鄉也命之進猶不敢進其能無因而前敢謂盛德兼容謙卑自牧特枉來介貽以誨函落紙雲煙爭光日月而又實之

厚幣佐以上尊此王弘檀道濟所不能兼施於陶靖節其實何人而可稱此惟當銘佩永矢弗諼侍郎名德之重盍在廟堂機庭宥府亦多虛位賜環之召海宇顛顛然竊窺盛心體國愛民等視內外似不靳少畱以幸此邦某旣趨進無由徒深愛助抑聞尹鐸之爲晉陽不爲繭絲而爲保障趙氏卒賴之昔人慮事之深計效之長如此伏惟高明燭微探賸過鐸萬萬此邦之人旣以屬厭仁政惟勿替此心旣寬之又寬之異時外折遐衝內固吾圉



或於此乎有賴某不勝幸願自餘頌詠之語祈鄉  
之私度亦厭聽不敢以瀆伏乞台照

二

竊以炎夏方中甘霖繫望恭惟某官夤奉寬書盡  
蘇民瘼精微一意奔走百神台候動止萬福某田  
里宅生追胥不及日得與樵夫牧叟詠歌德政以  
樂餘年有萬斯幸惟是事上有常禮而某獨以疾  
廢望黃堂若方丈瀛洲然亦甚自悵凡骨之不仙  
也某一介無所肖似昨荷郡博士不鄙惠書道使

君將修方志以重此邦今某搜訪前輩行治以禪  
會粹繼邑大夫過訪出所得台翰亦謂如此顧惟  
晚末豈足以知前言往行第以奉命爲寵不敢引  
辭黽勉期年幸已就緒名曰京口耆舊傳以私居  
之紙札俱繆繕寫不虔不敢徑達謹納郡博士處  
倘得台旨收上略經電覽賜以數語冠諸篇端庶  
藉品題足傳不朽某冒昧控懇皇恐之至侍郎再  
歲此邦百廢俱舉議者以爲盡還承平文物之舊  
甚善甚盛文昌虛位薄海傾詹邦人拳拳預恐不



得久私大惠抑昔人有言道行乎朝廷則天下被  
賜祇奉遄歸之詔茂隆夾輔之勲某與海內函生  
旦旦引領

三

伏拜台翰以某寓居之邑開賑濟局不鄙委令與  
令佐講求利病仰見某官惻怛爲民由已饑溺謙  
虛接下忘士賤微某至愚極陋何以辱此伏念某  
早歲無恙服役塵埃間頗嘗究心此事中年一病  
屢試三年之艾竟不復痊今不但形容變改心志

亦已彫落以此杜門人事盡廢那能出入公門參  
預荒政惟侍郎念之雖然老馬不任鞭策蓋嘗識  
路謹以所著荒政編一冊上獻其間自始至末纖  
毫備具蓋其少壯所嘗親歷非道聽臆說者比乞  
付局討論其間預計一條別紙錄出須特關崇覽  
若其言可行某雖不得身在執事之列然實與預  
聞末議者無異不然所言既是舛繆所行可知侍  
郎亦何取於若人者所準使牒已別具公狀申聞  
外伏乞台照



通史尚書前人時閒居滄洲

竊以炎夏之月氣爽如秋恭惟某官文昌之躔光  
連上相祠庭均逸薄海傾依台候動止萬福某寒  
鄉下士伏自京口召還之日得飭一箋致燕雀賀  
厦之恭叙犬馬戀軒之誠旋辱親答今一周星矣  
家窮山如坐坎井而猶得以自慰者郇翰在焉常  
若五雲之覆其上也尚書道足以濟時誼足以正  
君德足以範俗忠言嘉謀足以詔天下後世顧以  
大丞相親嫌卷懷而去海內缺望然忠臣雖在猷

齟猶不忘君況世位三公身登八座者哉外間傳  
聞當國勢危疑人心渙散之際言人之所難言裨  
公卿大臣之所不及使國勢危而復安人心散而  
復一惟尚書是賴尚書雖與平原草木居與午橋  
風月而功在社稷澤在生民固不落朝夕論思  
日月獻納者後甚盛甚盛某受才不穎賦分數奇  
當強仕之年而得風疾形容變改遂不復可仕方  
嘉定初元朝廷更化首叨堂審之命既以疾辭矣  
安有辭榮於血氣方剛之時而可求榮於血氣既



衰之後乎尚書念提封之舊而忘其陸沈欲曲成之故當聖天子求士之初首加論薦朝廷觀人以所主復不加考察俾綴縉紳之後其實何人有此殊遇詩曰中心藏之何日忘之謂矣而自揣如前所云不容勉強有孤尚書之厚恩則又重自歎也或又謂某所以受知止以十八年忍貧不出之故則尤非所敢當夫樂富貴而羞貧賤某豈有異於人使天假之年一朝疾愈則抱關擊柝某不恥爲雖三上書如韓吏部兩及門如張師德猶以爲簡

也惟尚書察之某已再具情實控辭乞終老漁樵因及二三同志之士可備朝廷採擇者居山林久不知分義敢爾妄發度必得罪然某固其之拙作三篇皆十年前所作錄去資一笑區區願忠之悃頗多此未敢遽爾當暑惟祈滌煩致爽以毓天和以爲我宋宗社無疆之福某一飯必祝潭府列仙之集非寒賤所敢貢問舊治有委役敢不敬承某義當修辭以致知己之謝僻居無便某又非巧於伺便者里中趙和仲侍郎之子爲穿山礮鹽塲其



家僮行便無過此者敬勒此以叙下悃萬一

通知臨安趙尚書

**師**

竊以炎夏正中其霖繫望恭惟某官冠六卿之位  
總三輔之權威行惠孚人頌神贊台候動止萬福  
其一自開府之初冒貢尺牋之敬侯貢士還家聞  
已關電覽日後以農桑務急曉夕弗遑亦知京尹  
事殷應酬弗給承候之恭不惟不敢亦不暇文昌  
之光上映三台萬目睽睽同此引睇天府之任久  
不營才黠吏姦民相爲肘腋視法禁如無有以號

令爲等閒幾不可爲矣尚書視印曾幾何時卽變  
而通之姦民革心黠吏破膽鋤筭不壅桴鼓稀鳴  
商賈阜通驩聲載路基圖由之鞏固朝廷因之尊  
嚴古有趙張三王其尹京兆也或一至而窮或再  
至而敗尚書今四至矣事愈難而才愈裕此固非  
淺鮮者所能測識宜遂登庸使周召之勲不專矣  
於前而制綽未頒豈猶有待而然卽時其雨未至  
暑氣日隆尚書鍾天地泰和方將燮調陰陽以福  
斯世視履觀頤特其餘事某不敢贅請



漢世通知鎮江倪尚書

其不效贊論

竊以秋臨季琯金氣高明恭惟某官卷懷經濟之業來惠疲瘵之民萬井歡呼百神呵護台候起居萬福某陋巷孤生不幸食貧早與世接悠悠風塵未見剛者尚書其人歟尚書大節日星昭明奴隸皆知之不贅叙以爲諛詩曰德翰如毛民鮮克舉之惟仲山甫舉之愛莫助之又曰高山仰止景行行止某不勝拳拳時事如大厦之傾所憂棟撓頽非綢繆若蘿蔓然者所可知幸有會一任重之才

進不居高位在高位亦罔克久天歟其人歟尚書立朝天下懽然曰尚書位冠文昌其遂將秉鈞乎某曰不然尚書之所抱負之所言論之所設施異乎今之從政者天未悔禍解絃伊始而覆轍不懲尚書其遂去國矣未幾而京口之命果下或者又曰尚書之道行乎朝廷則天下被其賜其肯歛之一州乎其遂將隱矣某又曰不然尚書朝舊臣二十年法從旣非潔身亂倫者進以禮退以義綽然有裕亦豈諫不用則怒悻悻然者哉且千里而守



有社稷有民人有財用有刑賞之柄又地當要衝  
北府兵天下所畏孫仲謀劉下邳所藉以興方時  
多虞得人焉而靜鎮之折淮北之衝固浙右之圉  
其庸多矣尚書乎何辭今聞已諏剛日遂抗前旌  
幸甚幸甚某懶與性成病與運會烏復可處於士  
君子之列以是奉祠東歸掃迹衡茅種蔬執麻以  
自業暇則挾冊讀書詠歌古人不復以姓名聞於  
有位者尚書之來自以松苓遠志小大才殊而氣  
味相似緘辭薦誠不能已已輒裁短敬而侑以一  
箋窮居無書史強所不能筆縱字大或塗之或乙  
之非所以事上惟幸恕之一登龍門疇昔所願乃  
今受塵爲氓往役有日矣而病不可前遇合固有  
分耶天未厭宋聖德又新選衆而舉伊臯不夙則  
莫謹上爲世道崇重之請

通如尚書

竊以卽日恭惟某官下清吏選上沃聖心天棊人  
佑台候動止萬福某瑣尾之跡伏自庚午歲草率  
一牋以道鄉仰去思之情辱賜報章浪跡江湖無



從嗣敬去歲審聞九重求舊一札賜書起安石於  
東山登巨源於選部縉紳興起宗社安榮爲當世  
賀曲踴巨躍顧久自放繩墨之外不復敢以姓名  
自達仰高泳深何日忘之仰惟某官端靖之操足  
以鎮俗之浮溫潤之氣足以納君於善卓越之才  
足以措生民於理早冠多士歷著外庸回翔三紀  
之間望實之孚如揭日月故一朝召用海內函生  
顛顛望賜夫豈彙從所得久稽柄用之期匪朝伊  
夕某雖萬念已空猶願拭目某迫於手足之義僭  
越有稟云云某舊疾不可復療飯蔬飲水足活餘  
齡猶望知己登庸使庶績咸熙物無疵癘庶含哺  
鼓腹得長爲太平幸民敢私以請神依正直隲相  
靡遙節宣之功粗矣故略

通張寺丞鑄

竊以雨洗清秋天開霽曉恭惟某官脫屣周行岸  
巾故里神依正直人仰退閑台候動止萬福某日  
念祗伏通德里門贊歸來之喜謝臨訪之勤仰惟  
累年去家一朝反旆方點檢賜書按行松菊必未



暇接納鄉里晚生以是夷猶未敢前不腆某物專  
人齎獻少寓區區之誠敢望台慈不賜斥絕事以  
久明論以久定有如望實炳如日星豈氛霧所能  
久翳切計清議有歸聖朝求舊趣還之詔近在朝  
夕某尚及於未束裝之先一展尊德事長之恭茲  
得以略

回張寺丞前人

竊以堅氷在候愛日舒和恭惟某官家山容與宣  
室興懷溫詔鼎來明神胥衛台候動止萬福某一

自疇昔修敬辱下陳蕃之榻開北海之尊使之侍  
教誨於左右觀道德於後先屬厭連日而後歸慰  
感裝懷非復之辭可狀亦屢與二三朋友約合辭  
稟謝出處不齊迄今未遂辱華翰先之剝封莊讀  
識先生長者所以容接後進之意委曲周悉一則  
以喜而退惟不敏亦一則以懼也倒指還轅倏已  
累月竊計區畫已定昔人所謂林園之勝鐘鼓之  
樂當不偏廢何當操杖屨一從名勝之後臨風依  
詠悵無羽翼家釀滴薄與官酌相伯仲客至無以



接殷勤正爾作惡乘壺拜貺色清味勝因以想見  
德人風味更深銘著亟此稟控不究謝悃萬一尚  
須專狀

二

竊以涼風應律殘暑倣裝恭惟某官心與雲閒氣  
涵秋爽貴名益起新渥方來台候動止萬福其一  
牋致敬辱賜之答日念造通德里以三徑之開爲  
松菊賀雲關之不掩爲猿鶴賀賞心樂事之并爲  
明月清風賀顧以病未能搖搖心旌胡靡有定方

舊疾未愈而新疾交作內爲濕所攻而外爲風所  
襲兩手足俱痺醫藥未效使者正以此時持台翰  
至剝封莊誦詞如離騷經而意不減逍遙篇疾讀  
一再過令人意氣豁然不覺沈疴之去體矧又重  
之以腆貺筆墨等四者尤極製作之精都文房之  
選顧寒陋何足以稱惟珍藏十襲永矢弗諼而已  
長者賜而弗親具謝乃使兒曹代書速戾無可言  
者而情則猶在可恕之域上乞矜體某已與張端  
袞王穎叔約須餘暑盡去卽同棹小舟聽命於喜



歸亭下毋使山靈勒移幸甚幸甚

通張寺丞前人

竊以秋序平分殘暑退舍恭惟某官清名日顯好語天來人頌神依台候動止萬福某區區之蹟不到函丈者踰年不修子墨之敬亦十閱月矣不敢以漫浪自諉少長有分不敢瀆爾仁心仁聞善言善行與西山爽氣靡日不在某蓋仰之彌高挹之愈深涵詠之嗟嘆之不知手之舞足之蹈也橘綠柚黃正一年好處桂樹蜚香菊梢亦已著蕊矣伏

惟某官以陶謝胸次得枚鄒賓友晚風夜月觴詠相屬其樂如何然上方凝思宣室正恐謝太傅不得久安東山之卧耳某輒恃眷私敢布僭越之懇云某久與穎叔約爲青龍洞之游後月初穎叔云或遂此行當便道伏謁茲不贅叙仰乞台照

通張潮州前人

竊以卽日寒事方殷微陽已復恭惟某官趣行之詔將下九重百神後先台候動止萬福某昨反旆家山首修門墻之敬辱予進且留連飲食之慰感



裝懷非筆舌可狀日念展紙濡毫寫萬分一布之  
涓史屬以乞祠未下進退失據方寸擾擾因循迄  
今乃若事間心寧則常若染教餐和於函丈間也  
朝家盡屏羣小開示正塗善類朋來有如名德豈  
容先一州而後天下切料戟衛未及門而介圭已  
入覲矣非佞某小幹自吳門回偶得某物稽昔人  
美芹故實僭越持上方華筵羅水陸之珍得齒桃  
李盤幸甚永嘉某局視他處所製差勝解以一副  
拜納瀆尊愧懼之至

二

竊以春事向晚生意方殷恭惟某官錦衣容與千  
騎趣行神天默扶台候萬福某不上燕輿問恰四  
閱月棄官歸來日與漁樵爭席姓名不徹於王公  
之前理則宜然德盛望尊如門墻則乃心依乘不  
若是憇也忽墮誨墨欣浣無涯某物禮隆物腆顧  
施之晚末閒散之人台意屋也幼賤有分不敢控  
辭卽已秣拜惟是才疎性拙出門無與惟欲招並  
舍漁樵之侶共擊鮮醺酒之樂顧恐知所自來爭



漢堦文集卷之八  
席者避猶豫未能也潮陽文公之政數百年無繼  
之者乃今得人千里之民引領北望庶拊我乎猶  
遲其驅豈歛惠一州固非君相意耶詔音鼎來某  
雖與世相忘猶能矯首爲天下賀朝暮猶有微寒  
惟爲世道珍嗇

通常州趙通判時侃

伏以涼秋九月金氣高明恭惟某官貳政雄藩政  
聲籍甚台候神相動止萬福某逃去顏範倏忽累  
載酷罰所鍾肝膽摧裂苟延視息以奉几筵坐是

雖涓辰滌篆亦不克奉一紙伸燕雀之賀惟有尊  
仰契丈天資之高才具之敏輔之以問學發之以  
文華行乎今之世何啻錐處囊中其末立見而以  
天球河圖橫陳道上佇當挈歸爲清廟器下車以  
來雖未獲預聞維新之政到京口見餉使說毗陵  
經總制錢連年積壓方未知所以爲計忽得賢者  
來以身任責且經畫有方自此必無欠折之患歎  
服不已又見里中人就試毗陵者歸來稱誦區處  
試院事井井有條亦知解數千牛之刃批大郤導



大窾無不可者欽歎欽歎

二云

進見未有期所祈

悉於自養重於自將以須召對副鄉里顛顛之望

回臨安趙通判

前人

伏以清和在候恭惟某官別駕之功著於天府簡  
於上心台候神相動止萬福某春間匆匆過都不  
及爲上賀之客幅紙謝不敏審卽關徹旣還敝止  
惟藥裹是親失於嗣問正極馳仰伏拜台翰之辱  
愧慰不可言契丈政理之長學業之富過人遠矣  
京之少尹自昔爲華要之階矧在今日由鄉闈而

上禁途不夙則莫縉紳顛顛式佇除目之頒某學  
淺才疎無能爲役重之以疾病形容日惡萬念灰  
冷疇昔丐祠殆非得已相君以向來名在屬吏必  
欲委曲成就之又得契丈借以裏言猥叨堂審之  
命敢昧源流小官不敢干方命之誅只候秋間賤  
疾少退日起發尚慮以逋慢違戾有可爲委曲借  
言處母愛於言幸甚尚遠披承惟爲遠業珍衛茂  
迎新渥

賀趙滁州

前人



漢塘文集 卷之八  
伏以秋序平分清商泛 恭惟某官千騎東來邊  
城聳動神人後先台候動止萬福某不上記又累  
閱月通才敏識出際風雲之會天下士無問識不  
識皆願依餘光走下風獨某屏居衡茅不克趨承  
於輿隸之間如此景仰何茲審膺時特選守國要  
衝成命一頒千里長淮隱然有金城之衛防秋事  
竟先生自此升矣某敬拜手爲執事賀重爲斯世  
賀某壯懷牢落舊疾浸淫分甘終老丘園已再具  
狀申省乞終嶽祠之任不復爲仕進計矣但鄉邑  
不能半熟飛蝗四合未知向後竟如何令嗣內機  
兄比數相見清姿逸韻不愧乃翁天高氣清小隊  
經行山川亦當改觀淮民待哺甚急得夙駕星馳  
布宣德意幸甚

回趙滁州前人

竊以仲秋幾望金氣高明恭惟某官課最長淮望  
高宗翰趣還有詔神人後先台候動止萬福某自  
棄明時苟安農圃無足爲有志斯世者道巨源之  
視叔夜雖出處不同要不爲無林下之舊每明月



清風未嘗不與朋友緬想佳致鼎來華問足慰此  
情建茗洪筴併頒尤佩眷予之意繼自今俗塵可  
障滯慮可滌受惠不淺滁陽士馬之餘前輩之風  
流幾墜台座開藩會未兩月百廢具舉而規撫壯  
觀且有加於舊抑可以爲難矣同時臨遣諸賢譬  
之俗庖更刀不闕則折而游刃獨如許鼎鑑有耳  
曾謂當路者而肯其受蔽賢之戮耶如聞天一之  
頒近在旦夕諒深稱愜升沈益殊無從晤對因風  
敬上爲宗社自重之祝

回浙西安撫趙侍郎前人

伏以仲春令月時和氣清恭惟某官總三輔彈壓  
之任倡九牧阜成之功宗社奠安穹祗隲相台候  
動止萬福某伏自介圭入覲之日不得率先鄉人  
展道左之敬日後伏承擢從星省盡護神臯貴名  
之起如揭日月如轟雷霆某於此時雖欲修掃門  
之役躬執鞭之隸何由可得高山仰止第勤此心  
世變益下通才不多得泥文者或不知變而應變  
者或失其正得其全而不倚於偏台座非其人歟



道路之傳以爲開府以來政適其宜而不剛不柔  
交得其道而不諂不瀆桴鼓不鳴而盜無容蹟鈎  
距不施而物無遁情以至鈛筦無壅囹圄空虛蓋  
年來所創見甚善甚盛首善之地四方風化之本  
宦達之始千載勲名之機更長慮而遠觀焉則歐  
范諸賢由此而升前張後王不足進也如何如何  
其一病不啻七年而三年之艾屢試不效蓋天之  
所廢人力無所容年來不惟仕進之念息絕人事  
徃復亦置不問敢謂久要之情有容之量度越流

俗先之以誨翰重之以臺餽使敝帚增重涸鮒得  
濡某何感如之某何愧如之日伺令嗣之行具狀  
以謝因循迄今益負不敏尚幸台照

二

竊以夏秋之交雨餘清潤恭惟某官天府政成聖  
心簡在卽持紫橐入侍清光神人具依台候動止  
萬福某病容老色交侵非復故我然能飯蔬飲淡  
以樂餘年則惟弘庇是籍寧不知歸一自故歲一  
再上記爾後審聞當宁疇庸絲綸屢下禮闈擢秀



蘭玉爭榮念當一貢賀牘顧位分有殊不敢數數  
乃若區區贊喜之誠仰高之愫固不落他人後庭  
梧鵲噪稚子候門雲翰墮前光彩奪目慰荷其何  
可言況又重之以腆貺耶大卿以一代挺特之才  
當千載明良之會大農國計所係商邑四方所仰  
異時知窮力竭舌敝唇腐而卒不勝任者衆大卿  
從容其間不動聲色而國以裕民以足強者戢姦  
者屏鉅筭無壅桴鼓不鳴其視史冊所載發擿以  
爲明而僅足以濟者難易美惡何啻什伯甚善甚

盛甚善甚盛浙河以西又復一稔鄉間下田頗浸  
而高田可仰者八九雖未知向後如何以目前觀  
之足爲樂歲闔境之人無非誦詠德政之日聞使  
介卽回函此以見感德謝賜之誠尚遠參承切乞  
倍萬珍賚益展壯猷厥今中原有可乘之勢聖上  
無自用之心相與經綸圖回以爲宗社無疆之計  
執事責也伏惟勉之某與海內函生惟日引領



公者國之寶也

持事責也外郵檢之其與新內函主郵日所驗

無自用之必味與蘇蘇國臣以為宗城無難之情

奇萬多奇益異非猶現今中京有可乘之機聖主

介唱國國出以見意新備現之類尚表參承也之

之其為樂意圖費之人無非請者蘇如之日開外

而高田百物皆人九種未味向新收所以目前國

知事者其意何人西





